

32.4.1.8
DI SQUISITIO
57
THEOLOGICA

IN QUA

Discutitur illa famosa Quæstio.

*Quinam Dei Amor requiratur & sufficiat cum
Sacramento ad justificationem.*

AUTHORE

FR. MACARIO HAVERMANS,
Ecclesiæ S. Michaëlis Antverpiæ Ordinis
Præmonstratensis Canonico, ibidem-
que S. Theologiæ Professore.

Qui non diligit manet in morte. 1. Joan. 3. v. 14.



3

LOVANI,

Typis Viduæ ADRIANI DE WITTE, sub
signo Pavonis, 1675.

Cum Privilegio & Approbatione.

34-4-C-8

Reverendo Admodum ac
Eruditissimo

D O M I N O

D. M I L O N I
V A N D E R S T O C K.

Ecclesiæ S. Michaëlis Ordinis
Præmonstratensis Canoni-
co, S. T. L. Pastori & Perso-
næ in Nederockerseel, &c.



RUDITISS. DOMINE,

*Desideravi diu habere occasionem
manifestandi interiorum meum erga
ā 2 Erudi-*

EPISTOLA

Eruditiss. Reverentiam vestram affectum ob multa mihi præstita beneficia, quæ continuo instant & urgent, si non pro retributione, saltem pro gratiarum actione. Retribuere pauper Religiosus non possum, esse gratum nulli etiam pauperrimo denegatur: inter beneficia vero percepta non minimum reputo quod mihi, adhuc Theologiæ Candidato, existenti in celeberrimo Europæ Athenæo Lovaniensi Academia S. Augustino specialiter devotâ, tum verbo instillaveris affectum erga S. Augustinum inter SS. Patres Corippeum, inter Theologos Aquilam, & ut verbo dicam naturæ miraculum, tum exemplo, adductisque ex horto Augustiniano selectis floribus omni odore gratioribus, id est quibusdam ex magno Patre adductis locis charitatem & doctrinam.

doctrinam mire spirantibus , fortiter instigaveris , ut sedulò & continuo tanto Patri vacarem , in quo solo curiosamens & salutis suæ sollicita anima invenire potest quidquid ad veram Theologiam & solidam pietatem conducere valet ; sic ut non mirer jam quotidianas vestras in Augustino lucubrationes, quæ nescio quem saporem palato sano adducunt , mirè recreant animum non nisi æternam sapientiam desiderantem , & valde accendunt mentem , licet non nisi terrena sapientem , cum non spirent nisi flammantem in Deum charitatem , hominemque totaliter à creaturis ad Deum adducant , ut meritò charitatis Doctor S. Aug. appelletur ; & sicuti olim tempore SS. Norberti & Bernardi commune erat elogium trium eminentium in Sanctitate virorum;

EPISTOLA

rorum ; in Norberto eminet fides , in Bernardo Clareval-
 lensi charitas, in Milone Ta-
 ruanenſi (*Ordinis Præmonſtra-
 tenſis Epifcopo*) humilitas , ita
 & de S. Auguſtino dici potuit : in
 Auguſtino eminet charitas, quâ
 non ſolum cor ejus jugiter incende-
 batur , ſed & de factò omnes ejus
 leſtores accendit. Sic ut non mirum
 ſit omnes S. Auguſtini diſcipulos ita
 extollere charitatis dignitatem , ita
 depredicare ejus neceſſitatem ita ex-
 aggerare ejus efficaciam , legerunt
 in ſuo magno magiſtro : Quale bo-
 num eſt charitas ? Quid pre-
 tioſius ? Quid luminofius ?
 Quid firmitus ? Quid utilius ?
 Quid ſecurius ? Univerſa inuti-
 liter habet , qui unum illud
 quo univerſis utatur non ha-
 bet.

Serm. 50.
 de verbis
 Domini.

DEDICATORIA.

bet. Hæc est margarita speciosa charitas : sine qua nihil tibi prodest quodcumque habueris , quam si solam habeas, sufficiat tibi. Sciunt & illud famosum S. Augustini dictum. Dilige & quod vis fac. Quanti autem cum tuo Augustino semper aestimaveris charitatem nobis constat, & sufficienter indicasti, quando in vestris, pro Laurea Licentiatum in Almâ Universitate Lovaniensi Matre nostrâ, disputationibus sequentia, jam à multis Annis, nempe Anno 1649. propugnasti: Non malè dicitur quod omnis virtus sit Charitas. Præceptum de referendo omnia in Deum est naturale, ita homini in omnibus suis operibus incumbens; ut omnia illa absolutè mala dicenda

Exposit.
s. in Ep.
Ioan.

E P I S T O L A

sint in quibus relatio illa deficit. Modus ergo Charitatis cadit sub præcepto, & verissimum dicimus S. Augustini pronuntiatum, legem non implet nisi Charitas. *Et similia, quæ sunt Augustiniana doctrinæ principia & solidæ pietatis fundamenta. A quibus non nisi illi aberrant; qui nescio quos S. Augustino præferunt, hinc contrarias ejus doctrinæ hasce maximas defendunt; Attritio ex solo Gehennæ metu sufficit ad Justificationem cum Sacramento; potest dari opus unde quaque bonum sine Dei propter se Amore, imo & meritorium vitæ æternæ. Non tenemur actu interno amicitia alterum diligere, & similia nec mirum quod à veritate aberrant qui in aliquo Charitatis*

tis

tis viam non intrant & à Charitatis Magistro declinant, nam teste Prospero: Charitas via est quæ ducit per se ambulantes ad Patriam, quia sicut sine viâ peruenit nullus quo tendit: Ita sine Charitate, quæ dicta est via, non ambulare possunt homines, sed errare. Quid mirum ergo est quod errent qui Charitatem ad opera nostra vix aut non necessariam judicant; attamen deplorandum quod in errorem multos secum abducant; eò plus errantes quò longius ab Augustini doctrina recedunt. Ecclesiam magno nostro mœrore, tales multos alit degeneres S. Patris Augustini filios, si illo nomine digni sint, & inter illos aliquos qui simul sunt Professores & Pastores, tantò perniciosius, quò non solum suorum

lib. 3.
de Vita
Con-
temp.
cap. 13.

EPISTOLA

errorum venena pluribus ovibus sibi commissis, quarum animas ex eorum manibus exiget Deus, sed & suis studiosis instillant, qui cum tempore animarum curam suscipere debebunt. Felices Pastores qui suos pascunt verbo & opere, & per viam Charitatis quæ ducit per se ambulantes ad Patriam, suas oves deducunt. O quam secure Christo Domino rationem de ovibus suis reddent, qui per securiores semitas eas secum adduxerunt; & quam multi qui per solas probabilitates processerunt, ordinarie ne quidem probabiliter securi, tremebundi desiderarent in illo Iudicii die, in quo non secundum humanarum opinionum vanitatem, sed secundum æternæ legis veritatem judicabuntur, quod tutiori viâ processissent. Dies illa revelabit quis bene processerit, an
 qui

qui laxis, an qui strictioribus se conformavit opinionibus. Charitas certe Augustiniana magis certam vult suos facere vocationem suam, quam ut arundineo illi probabilitatis innitantur baculo. Felices oves quibus tales præsunt Pastores, quantum enim à vitâ & directione Pastorum dependeat salus ovium multimodis comprobatur experiētiis, si enim cæcus cæco ducarum præstet, quid expectari potest, quam ut ambo in foveam cadant? Felices possum dicere oves quas dirigunt Pastores qui sunt educati in Augustinianâ scholâ, qui dirigunt se suasque oves sibi subjectas secundum maximas à Sancto Patre suppeditatas; & in hoc congaudeo & congratulor Præmonstratensibus Canonicis qui talem nacti sunt occasionem; & speciali indubiè Providentiâ Divinâ factum

EPISTOLA DEDIC.

factum est, ut ille Ordo, qui specialiter à Sancto Patre nostro Norberto institutus est, & ad hoc à Sede Apostolica confirmatus, variisque condecoratus privilegiis ut sui religiosi curæ animarum intenderent; etiam in bonâ doctrinâ floureret, ut sic in Monasteriis in pietate & sapientiâ strenuè exercitati Apostolico S. Patris sui spiritu pleni, vineam Domini quaquaversum strenuè excolerent, & copiosos animarum manipulos ex toto mundo in horreum Ecclesiæ deportarent, sicque Oves sibi à Christo commissas in die Iudicii restituerent, recepturi operis ac laboris sui justam mercedem, quam & Reverentiæ vestræ tamquam bono & vero Pastori, non ovium tonsori, sperat & exoptat.

F. MACARIUS HAVERMANS,

Cum Scholâ Augustinianâ

S. Michaëlis,

Facultas Superiorum.

DISQUISITIO THEO-
 LOGICA super actu A-
 moris Dei, requisito ad justi-
 ficationem cum Sacramento,
 facta per R. D. *Macarium Ha-*
vermans, Ecclesiæ S. Michaëlis
 Ordinis Præmonstratensis Ca-
 nonicum & S. T. Professore,
 typis evulgari poterit 24. Mar-
 tii 1675.

LIBERTUS *Abbas Parchensis*
 & *Vicarius Generalis.*

Approbatio Doctorum.

Libellus . quem R. D. Macarius Havermans composuit de Divina ad Pœnitentiæ Sacramentum necessaria Charitate , est sanæ Doctrinæ , nec aliquid continet , quod pias Ecclesiæ aures possit offendere. Dabam Lovanii , die 18. Aprilis 1675.

F. CHRISTIANUS LUPUS,
Sacræ Theolog. Doctor ac
Professor

Idem Censeo.

G. HUYGENS , Sacræ Theol.
Doctor.

CENSURA ORDINARII.

DISQUISITIO hæc THEOLOGICA de Amore Dei requisito & sufficiente ad justificationem cum Sacramento; Authore R. D. MACARIO HAVERMANS, Ecclesiæ S. Michaëlis Antverpiæ Ordinis Præmonstratensis Canonico & S. Theol. Professore, publicam lucem meretur. Dat. Lovanii 16. Martii 1675.

LAMB. VINCENT S.T.D.
& Prof. Libror. Censor.

Idem Judico.
Actum Bruxellis 4. Aprilis 1675.

J. ROUCOURT Lib. Censor.

APPROBATIO.

Disquisitio Theologica in qua discutitur, &c. Authore R^{do}. Admodum D. MACARIO HAVERMANS Imprimi poterit. Datum Lovanii 20. May 1675.

NIC. DU BOIS Lib. Cens.

SUMMA PRIVILEGII.

CAROLUS Dei Gratiâ, Rex Castellæ, Arragoniæ, utriusque Siciliæ, &c. Archidux Austriæ, Dux Burgundiæ, Lotharingiæ, Brabantiae, &c. Comes Flandriæ, Arthesiæ, &c. Diplomate suo sancit ne quis Librum, cujus Titulus est **DISQUISITIO THEOLOGICA**, Authore admodum Reverendo Domino **MACARIO HAYERMANS**; præter Viduæ *Adriani de Witte* Typographi ac Bibliopôlæ in Universitate Lovaniensi voluntatem, ullo modo in Belgio imprimat, aut alibi impressum in has inferioris Germaniæ ditiones importet, venalemve habeat. Qui secus faxit, confiscatione librorum, & aliâ gravi pœnâ mulctabitur, ut latius pater in litteris datis Bruxellis, die 22. May 1675.

Signat

LOVENS.

DISQUI-



DISQUISITIO THEOLOGICA.

§. I.

Scopus & intentio Authoris.

Duturnâ experientia comprobatum est semper in Ecclesiâ, etiam inter Catholicos Doctores, particulares quasdam de variis particularibus quæstionibus motas esse controversias, & simul atque una sopita est, alteram suscitari. Quæ controversiæ licet quandoque per accidens, ob quorundam petulantium ingeniorum mordacitatem, & tumultum, scandalum aliquod generent; serviunt tamen, tum ut ingenia exercitentur, tum maximè ut penitus & funditùs quæstio illa tractetur, cum tunc sedulâ indagatione patefeat, quid verbum Dei Scriptum & Traditum, quid Concilia, quid Patres, quid Primitivæ Ecclesiæ

A

clesiæ Praxis ac Veneranda Antiquitas sentiant circa illam difficultatem, & sic fit, ut veritas magis roboretur & elucescat.

Jam acriter ab aliquot annis disputatum est de necessario & requisito dolore de peccatis cum Sacramento ad justificationem, ex quo nempè motivo procedere debeat; variis post Tridentinum Concilium opinantibus dolorem ex solo gehennæ metu, sine ullo Dei propter se admixto Amore, ad justificationem sufficere, hancque doctrinam à Concilio Tridentino fuisse traditam: aliis econtra fortiter & constanter propugnantibus omninò necessariò dolorem de peccatis ex Amore Dei, propter se, debere procedere ad hoc, ut cum Sacramento justificet: & hanc mentem Patrum Concil. Trident. esse asserunt. Et, quamvis adhuc sub judice lis sit, tamen hoc diuturno illo conflictu effectum est ut satis jam ex S. Scripturâ, Conciliis ac SS. Patribus colligatur; verum Dei propter se Amorem ad Attritionem sufficientem & necessariam cum Sacramento requiri; pro-ut latè ostenderunt Eximii Patres, Lupus & Fervaquez, S. Theologiæ Doctores Lovanienses in variis Tractatibus de illâ materiâ conscriptis, & post illos R. D. Hieronymus Harts in tractatu de Attritione, & nos breviter in Tyrocinio

nio Theologiæ Moralis, parte 1. tract. 1. cap. 6. §. 6. Quam sententiam specialiter esse de mente Melliflui Ecclesiæ Doctoris S. Bernardi novissimè clarè ostendit Reverend. ac Eruditissimus D. Albericus vanden Kerckhove, Abbatia S. Salvatoris, Antverpiæ Ordinis Cisterciensis Prior, ac S. Theologiæ Professor, in Disquisitione Theologo-Bernardinâ de Attritionis Dei propter se Dilectricis cum Sacramento Pœnitentiæ necessitate. Quibus Authoritatibus & rationibus si vel hoc solum probaretur, quod nostra sententia verè sit probabilis, sufficeret ad contrariam sententiam è praxi eliminandam; maximè cum in materiâ Sacramentorum, quandò agitur de aliquo essentialiter ad Sacramentum requisito, omninò tutior pars sit sequenda: cum nulla probabilitas possit supplere partis essentialis defectum, & communis Theologorum doceat sententia, extra necessitatis casum esse mortale peccatum, uti materiâ aut formâ dubiâ, dum certa haberi potest; uti alibi probabimus.

Verum usque hætenus non ita discussum est, qualis præcisè Amor requiratur & sufficiat cum dolore de peccatis ad justificationem cum Sacramento. Cumque adversaria Pars continuò instet & urgeat ad ejus quæstionis decisionem; mens mea est

breviter Vestræ Eruditissimæ Dominationi declarare, quid mihi in hac difficultate videatur.

§. II.

*Ostenditur quomodo eadem difficultas
urgeat adversarios, quæ nostræ
sententiæ defensores.*

ANtequam determinemus qualis Amor requiratur, prænotandum est quod, licet daremus nos non posse determinare, qualis præcisè Amor requiratur, inde non sequatur nullum Dei propter se Amorem requiri ad justificationem cum Sacramento. Primum enim satis nobis Scriptura, Concilia & Patres (ex quibus Theologicæ veritates deducendæ sunt) insinuant: at non ita secundum. Nec mirum, cum plurima in Theologiâ nos lateant, quæ soli Deo certò cognita sunt. Et fortè id speciali Dei Providentiâ factum est, ut, sicuti nobis incertum esse voluit an odio, an amore digni simus, ut continuò indefinenter studeamus nos magis magisque Amore Dei dignos reddere; ne ubi tanta est infirmitas, superbiam & socordiam generaret securitas. Et de propitiatione peccati noluit nos esse sine metu, ut sub incertitudine Reconciliationis conaremur

nos

nos Deo continuò perfectius reconciliare; ita etiam occultum & incertum nobis esse voluerit qualis precisè Amor requiratur ad justificationem cum Sacramento, ut sic pænitens sciens se debere adhibere aliquem Dei offensi propter se Amorem, & nesciens qualem, quam magnum, quam vehementem, eò majori curâ conaretur ad perfectum Dei Amorem pertingere, ut sic securissimo modo è coeno peccatorum se extrahat, & ad Deum se convertat.

Unde omninò obligantur Parochi & Confessarii populum adhortari ad perfectam contritionem ex Charitate Perfectâ procedentem, tum quia, dum ad illam accessi fuerint, adhuc forte in purum aliquem Dei propter se Amorem vix dilabentur, tum quia illa sententia, quæ requirit ad justificationem etiam cum Sacramento perfectam contritionem nondum ab Ecclesiâ proscripta sit, & à Catholicis Authoribus adhuc defendatur, ut infra videbimus: quæ, si vera foret, nulla probabilitas illius defectum supplere posset.

Deinde eadem difficultas de Amore secundum nos ad Attritionem requisito, Authoribus contrariæ sententiæ solvenda est de Tempore. Cum enim non quilibet

6 DISQUISITIO

gehennę Timor excludat voluntatem peccandi, adeoque non quilibet sit sufficiens ad justificationem cum Sacramento; etiam determinare debent, qualis ergo Timor requiratur. Nec sufficit dicere se exigere Timorem efficacem, ut quosdam respondentes audiui: idem enim & nos eodem jure dicere possemus de Amore, nempe requiri Amorem efficacem. Cum autem hæc adversariis non sufficiat responsio, sed ulterius exigant qualis iste Amor efficax esse debeat; etiam nobis adversariorum responsio non satisfacit, sed ulterius exigimus, qualis, quam magnus, quam vehemens, quam intensus, quam diuturnus debeat esse iste Timor efficax.

§. III.

An sufficiat cum Sacramento ad justificationem Amor Concupiscentiæ Sanctæ, seu Castæ.

Sufficere illum Amorem Castę Concupiscentiæ ab aliquo tempore quidam recentiores docere inceperunt: attamen illa sententia nunquam mihi placuit; cum vel Amor ille coincidat cum Amore Dei propter se, vel hunc saltem præsupponat, vel non sufficiat ad justificationem.

nem. Quod ut ostendam notandum vocem illam, *Amor Castæ Concupiscentiæ*, esse vocem ambiguum, sub quâ magna latere posset deceptio: quæ ut evitetur, notandum per Amorem Castæ Concupiscentiæ posse intelligi affectum, quo nobis quidem optamus ipsum Deum, in ipso tamen, & propter ipsum, *ut in æternâ vitâ sit Deus omnia in omnibus.* Ut loquitur S. Augustinus. Et ex illo Amore Castæ Concupiscentiæ censetur dolor ex metu gehennæ procedere, quando quis dolet se incurrisse reatum gehennæ: quia si in illam projiceretur, privaretur possessione Dei & impediretur in æternum à Dei Amore, beatitudine sua, ac moveretur ad odio habendum Deum.

lib. 3. ad
Bonif.
cap. 4.

Hunc Amorem Castæ Concupiscentiæ in spe, quando habet rationem virtutis Theologicæ, agnoscit S. Salesius in libris de Amore Dei; ubi inter cætera ait: *Amor igitur ille, quem vocamus spem, est Amor Concupiscentiæ, SED CONCUPISCENTIÆ SANCTÆ ET BENE ORDINATÆ, per quem non trahimus Deum ad nos, neque ad nostra comoda, sed ei nos jungimus ut finali nostræ felicitati. Simul cum Deo per hunc Amorem nos amamus; sed Deo nos non præferimus, vel æquamus in hoc Amore. Nostri ipsorum Amor est mixtus Dei Amori, sed Dei supernatur.* Proprius quidem noster Amor

intrat, sed solum ut simplex motivum, & non principale. Propria nostra utilitas aliquem in eo tenet locum, sed Deus primum & principalem.

Quod si nomine Castæ Concupiscentiæ intelligant talem Amorem, solo nomine discrepant ab alia sententiâ, quæ exigit aliquem Amorem Benevolentiæ erga Deum, seu Dei propter se Amorem; cum ille Amor Castæ Concupiscentiæ, vel sit Amor Benevolentiæ, vel illum saltem præsupponat; & consequenter & ille dolor, qui ex illo Amore Castæ Concupiscentiæ procedit, reverà ex Amore Benevolentiæ erga Deum procedit.

Verum si hoc intelligant per Amorem Castæ Concupiscentiæ; ad quid adhibere novam illam vocem ambiguum, & non potius communes terminos à SS. Patribus usitatos, nempe *Dilectio justitiæ*, *Amor Castus*, *Charitas* &c. ? Theologus enim maximè ad hoc anniti debet, ut, sicut ex Patribus eruere debet veritates Theologicas, ita & illorum terminis insistat, cum in Theologia summoperè sit veneranda Antiquitas, & repudianda omnis Novitas.

Si autem per Amorem Castæ Concupiscentiæ intelligant affectum, quo nobis ipsis optamus Deum, quia nobis bonum est summum illud bonum possidere, quod
solum

solam satiare potest appetitum nostrum, ibi hærendo, & id non ad Deum retorquendo, vel reflectendo; tunc dolor censetur procedere ex illo Amore, quando dolemus de peccato, tum quia nos privat illo summo bono, quod nobis propter nos volumus, tum quia afficit nos gravi poenâ, quâ cruciamur.

Et quidem illum dolorem non sufficere ad justificationem omnino affirmo. Primò quia, sicuti ille Amor Concupiscentiæ est inordinatus, juxta illud S. Salesii suprâ, ubi ait : *Anima quæ Deum non amaret, nisi propter Amorem sui ipsius, faciens finem amoris, quem Deo defert, in propriis suis commodis; cheu! maximum committeret sacrilegium.* Cujus ratio est, quia ordo amoris exigit, ut omnia nostra in Deum, tanquam finem ultimum, dirigantur, ut latè probavi in 1. parte nostri Tyrocinii tract. 2. cap. 6. §. 1. Ita etiam inordinatus est dolor, qui ex illo Amore procedit. Secundò quia per illum Amorem & dolorem non convertimus nos ad Deum, sed ultimatè ad nos ipsos, propriumque nostrum commodum, in quo finaliter hæremus. Quare enim per talem Amorem concupiscimus Deum nobis? Nonnisi ut nobis bene sit, & ut nos summum illud bonum possideamus, sine ullò ulteriori ad Deum respectu. Et quare ex

10 DISQUISITIO

illo Amore dolemus de peccatis? Non-
nisi ut à nobis avertamus grave illud ma-
lum pœnæ, sine alio Dei intuitu. Ut enim
in nostro Tyrocinio latè ostendimus, non
nisi Dei propter se Amor in Deum tendit,
ibique hæret. *Donum Dei*, inquit S. Au-
gustinus, *proprie nonnisi Charitas intelligenda est;*
quæ ducit ad Deum, & sine quâ quodlibet aliud
Dei donum non perducit ad Deum. Et alibi:
Nam quid erit aliud optimum hominis, nisi cui in-
harere est beatissimum: id autem est solus Deus,
CUI HÆRERE CERTÈ NON VALEMUS,
nisi Dilectione, Amore, Charitate.

Liquent jam dicta clarè ex S. Bernar-
do explicante illa Psalmi 48. verba: *Con-*
fitebitur tibi cum benefeceris ei; ubi dicit: Est
qui confitetur Domino, quoniam potens est, & est
qui confitetur; quoniam SIBI BONUS EST: &
item qui confitetur, quoniam simpliciter bonus est.
PRIMUS SERVUS EST, & timet sibi. SECUN-
DUS MERCENARIUS EST, & cupit sibi. Ter-
tius filius, & defert Patri. Itaque ET QUI TI-
MET, ET QUI CUPIT, UTERQUE PRO SE
AGUNT. SOLA, quæ in filio est; CHARITAS
NON QUÆRIT QUÆ SUA SUNT. Quam-
obrem puto de illâ dictum: Lex Domini immacu-
lata convertens animas, QUOD SOLA VIDE-
LICET SIT, QUÆ AB AMORE SUI ET
MUNDI AVERTERE POSSIT ANIMUM,
ET IN DEUM DIRIGERE. NEC TI-
MOR

lib. 15. de
Trinit.
cap. 18.

lib. de
Moribus
Eccles.
cap. 14.

Epist. 11.
& lib. de
Diligen-
do.

MOR QUIPPE, NEC AMOR PRIVATUS
 CONVERTIT ANIMUM. *Mutant interdum
 vultum, vel actum: AFFECTUM NUNQUAM.
 Facit quidem etiam servus nonnunquam opus Dei,
 sed quia NON SPONTE, in suâ adhuc duritiâ
 permanere convincitur. Facit & mercenarius, sed
 quia NON GRATIS, propriâ trahi cupiditate
 cognoscitur. . . . Sit itaque servo sua lex Timor
 ipse, quo constringitur, sit mercenario sua cupiditas,
 quâ & ipse arctatur, quando ab ipsa tentatur ab-
 stractus, & illectus. SED HARUM NULLA
 AUT SINE MACULA EST, AUT ANIMAS
 CONVERTERE potest. CHARITAS verò
 CONVERTIT ANIMAS, quas facit & volun-
 tarias. Verba hæc non commentatore aut
 expositione indigent; sed tantum lecto-
 re, & nimis clara sunt, quam ut præjudi-
 ciis, vel aliâ de causâ aliò contorqueri
 possint.*

Hinc etiam Tridentinum quandò agit
 de dispositionibus necessariò requisitis in
 adultis ad Sacramentum Baptismi, inter
 alias dispositiones à Catechumenis ultra
 actum spei, qui indubiè magis ordinatum
 Concupiscentiæ Amorem, quam mox de-
 scriptum, includit, exigit formalem Di-
 lectionis Dei actum, quo Deum tanquam
 omnis iustitiæ fontem Diligere incipiant. Hinc
 etiam, quando contra hæreticos docet
 licitum esse inclinare cor suum ad facien-
 das

Sess. 6.
 cap. 6.

Sess. 6.
cap. 11.

das Dei justificationes propter retributionem, non Deo dandam, sed ab ipso recipiendam, tunc expressè addit, ut mercedem intueamur æternam *cum hoc, ut imprimis glorificetur Deus.*

lib. 15.
cap. 18.
de Trinit.

Possemus hanc sententiam latè ex SS. Patribus confirmare, qui ad justificationem clarè exigunt Dei Dilectionem, Dei Charitatem, &c. Sed hoc alibi præstitum est. Addo hic unum S. Augustini locum, ubi dicit: *Nullum est isto Dei dono (Charitatis) excellentius. Solum est quod dividit inter filios regni æterni, & filios perditionis æternæ. Dantur & alia per Spiritum sanctum munera, sed sine Charitate nihil profunt. Nisi ergo tantum impertiasur*

Serm. 7.
de temp.

cuique Spiritus sanctus, ut eum Dei & proximi faciat amatorem, à sinistra non transfertur ad dexteram. Cui adijunge illud: Pœnitentiam certam non facit nisi odium peccati, & Amor Dei. Maximè cum juxta SS. Patrum doctrinam qui amicum amat, ut præstet sibi aliquod commodum, non illum amet, sed illud. Unde dicit S. Bernardus: Quicquid propter aliud amare videaris, id plane amas, quò amoris finis persequitur, non per quod tendit. Et S. Prosper in libro sententiarum, quem multi librum de verâ innocentia intitulant & habetur inter opera S. Augustini tom.

lib. de
diligen-
do Deo.

Proposit.
20.

3. Qui Deum idèò colit, ut aliud magis quam ipsum promereatur: non Deum colit, sed illud, quod assequi concupiscit.

Sit

Sit ergò stabilitum ad justificationem cum Sacramento requiri verum Charitatis, seu Dilectionis, sive Dei propter se Amoris actum.

§. IV.

Non omnis Dei propter se Amor sufficit cum Sacramento ad justificationem.

Resolutio hæc continet communem sententiam Authorum nostræ sententiæ, qui requirunt aliquem Dei propter se Amorem ad Attritionem sufficientem cum Sacramento ad justificationem

Probatur 1. Quia nihil notius in S. Augustino aliisque SS. Patribus, quam quod *omnis bona voluntas sit Charitas*, uti ex Patribus ostendimus in nostro Tyrocinio parte 1. tract. 2. cap. 6. §. 3. Atqui non omnis bona voluntas sufficiens est ad justificationem cum Sacramento: ergo nec omnis Charitas, seu Dei propter se Amor. Deinde clara S. Augustini est doctrina, quandoque in infidelibus adhuc in infidelitatis tenebris, & in peccatoribus adhuc cæno peccatorum inhærentibus posse reperiri Imperfectum aliquem Dei Amorem propter se, quando Deus incipit tangere corda

14 DISQUISITIO

lib. 8. c. 5. corda eorum , & sensum disponere ad fidem & justificationem , prout latè probavi in nostro Tyrocinio loco citato , & patuit in S. Augustino , ipso teste , in libris Confessionum. Qui Amor , utpote nondum sufficiens ad excludendam voluntatem peccandi , etiam necdum sufficit ad justificationem cum Sacramento ; cum secundum Tridentinum voluntatis exclusio omninò requiratur ad sufficientem Attritionem , & dicet ratio quod , qui petit ab altero veniam offensæ , promittat & velit desistere ab alterius injuriâ. Vide Tyrocinium citatum parte 1. Tract. 1. cap. 6. §. 6.

Confirmat hanc rationem manifesta experientia. Nunquid non aliquando peccatores adhuc peccatis inhærentes piè & castè Deo afficiuntur , sibi que in illo complacere incipiunt ? Quidnam autem hoc est aliud quam incipere Deum propter se amare , vel ut loquitur Tridentinum , Deum tanquam omnis justitiæ fontem diligere incipere ? Quomodo autem hæc Dei Dilectio voluntatem peccandi excludit , cum maneant in suis peccatis & in illis perseverent , ac illa continuent & de novo perpetrent ?

§. V.

§. V.

*Non omnis Dei propter se Amor statâ
& infallibili lege justificat sine
Sacramento.*

Resolutio hæc à fortiori sequitur ex
priori, & inter Authores nostræ
sententiæ est indubitata, cui tanquam
rei certæ immorari frustraneum judica-
rem, nisi hic breviter refutanda foret
cujusdam Recentioris injusta censura,
quam inurit huic Resolutioni, cum dicit:
*Aliquam esse Charitatem, quæ tam debilis sit, ut sine
Sacramenti adminiculo peccatorem cum Deo re-
conciliare non possit, novum est figmentum & in
Ecclesiâ ante Bayum prorsus inauditum.* Attamen
injustus ille Censor parum scivit quid
SS. Patres olim docuerint, cum in illis
vix quid certius sit, quam non omnem
Charitatem hominem Deo posse recon-
ciliare sine Sacramenti adminiculo. Nun-
quid non habebat S. Augustinus Charita-
tem tam debilem, quæ non poterat homi-
nem peccatorem Deo reconciliare, cum
dicebat Deo: *Voluntas nova, quæ mihi esse ca-* lib. 8.
perat, ut te gratis colerem, fruique te vellem Deus, Confess.
sola certa jucunditas, nondum erat idonea ad su- cap. 5,
perandam priorem vetustate roboratam? Nun-
quid

De Grat.
& lib.
Arbitr.
cap. 17.

quid talem Charitatem non agnovit S. Augustinus, quando dicit: *Qui vult facere Dei mandatum, & non potest, jam quidem habet voluntatem bonam, sed adhuc parvam & invalidam: poterit autem cum magnam habuerit & robustam.* Ecce! per bonam voluntatem, more suo intelligit Charitatem, uti ex sequentibus patet. Verbis enim citatis immediatè subjungit: *Quando enim martyres magna illa mandata fecerunt, magnâ utique voluntate, hoc est, magnâ Charitate fecerunt.* Quasi verò, inquit alibi, *aliud sit bona voluntas, quam Caritas, quam scriptura nobis esse clamat ex Deo.*

De gratiâ
Christi
cap. 21.

Deinde in doctrinâ S. Augustini ad omne opus requiritur Caritas illud referens in Deum, tanquam ad ultimum finem, pro ut latè probavi in Tyrocinio parte 1. tract. 2. Atqui indubiè major requiritur Caritas ad justificationem sine Sacramento, quam ad opus aliquod in Deum referendum. Ergo.

lib. 8.
cap. 14.

Verum si Censor ille non multum deferat Autoritati S. Augustini aliorumque SS. Patrum, deferet saltem auctoritati Patrum Concilii Tridentini, qui teste Pallavicino in historiâ Concilii Tridentini manifestè agnoscunt Charitatem non justificantem. Cum enim in decreto Sessionis sextæ Capitis sexti de justificatione inter dispositiones ad justificationem cum Baptismi

ptissimi Sacramento necessarias Theologi
 exegissent, ut *Deum tanquam omnis iustitiæ
 fontem diligere incipiant.* Et postea cap. 7.
 iterum exegissent Charitatem tanquam
 formam iustitiæ, circa hoc mota fuit
 aliqua difficultas: *quibusdam, inquit, Car-*
dinalis Pallavicinus, animadvertentibus Cha-
ritatem superiori capite (nempe cap. 6.) me-
moratam, recenseri sub illius initium inter ea, quæ
preparant animum ad iustitiam suscipiendam, postea
verò (cap. 7.) tanquam iustitiæ formam poni,
responderunt decreti formatores in primo loco ser-
monem esse de QUODAM ACTU CHARITATIS,
CUM INSIT ALIQUA DILECTIO IN HOMINE,
NON QUIDEM OBTINENTE, SED EXOP-
TANTE IUSTITIAM: at in secundo significari ha-
bitum. Quorum resolutioni cæteri acquie-
 verunt. Datur ergo actus Charitatis in
 homine nondum obtinente iustitiam; il-
 lumque exigit Tridentinum à Catechu-
 menis ad justificationem in Sacramento
 Baptismi obtinendam, adeoque non om-
 nis iustificat sine Sacramento.

Ut autem omnis dubitatio tollatur, &
 ne sub voce, *Charitas*, lateat deceptio, no-
 tum est pervolventibus volumina SS. Pa-
 trum, hos passim confundere illas voces;
Amor, Dilectio, Charitas, Bona Voluntas &c. Uti
 nos alibi latius ostendemus, & vel ex uno
 loco S. Augustini palam fit, cum dicit:

lib. 14.
de Civit.
cap. 7.

*Cujus propositum est amare Deum, & non secundum hominem, sed secundum Deum amare proximum, sicut etiam seipsum: propter hunc Amorem dicitur voluntatis bonæ, quæ usitatus in Scripturâ Charitas appellatur: sed Amor quoque secundum easdem litteras dicitur. Nam & ipse Dominus Petrum interrogans cum dixisset, diligis me plus his? Ille respondit, Domine tu scis, quia amo te. Hoc propterea commemorandum putavi, quia nonnulli arbitrantur aliud esse Dilectionem sive Charitatem, aliud Amorem. Ideo scripturas sacras non aliud dicere Amorem, aliud Dilectionem, vel Charitatem insinuandum fuit. Unde licet aliqui quandoquæ inter illas voces distinxerint, tamen id non ab omnibus, neque etiam ab illis strictè observatum fuit. Scholastici tamen quandoque valde strictè sumunt vocem, *Charitas*, sic ut per illam intelligant habitum Charitatis, vel actum ab eo procedentem, vel saltem actum perfectæ Charitatis, & in hoc sensu Charitas sine reconciliatione cum Deo esse non potest. At in tali strictâ significatione non sumimus vocem *Charitas*, quando in Resolutione dicimus non omnem Charitatem, seu, quod idem est, non omnem Dei Dilectionem, seu non omnem Dei propter se Amorem justificare hominem sine Sacramento. Turpe est*

Theologo

Theologo de vocibus disputare, cum de re constat, nec malè loquitur Theologus, qui terminis Sanctorum Patrum inhæret.

Melius ergo nos è contra dicere possumus: *Non dari aliquam Charitatem, quæ tam debilis sit, ut sine Sacramenti adminiculo peccatorem cum Deo reconciliare non possit, novum est figmentum, & in Ecclesiâ ante Bayum prorsus inauditum.* Quod figmentum clarissimè SS. Patres & Concilium Tridentinum proscripserunt.

Hoc tamen hic notandum doctrinam nostram nullam planè habere connexionem cum doctrinâ, quam aliqui adscribunt Bayo. Hic enim author nullam agnovit imperfectam Charitatem seu imperfectum Dei propter se Amorem, uti constat ex Proposit. 37. condemnata à Pio V. & Gregorio XIII. quæ sic sonat: *Omnis amor* Prop. 37.
creaturæ rationalis aut vitiosa est cupiditas quâ mundus diligitur quæ à Ioanne prohibetur aut laudabilis illa charitas quâ per Spiritum sanctum in corde diffusa Deus amatur. Consequenter istius Propositionis Author docuit ad justificationem, cum Sacramento requiri Charitatem perfectam, quam & cum reatu æternæ damnationis posse consistere putavit, & non justificare, licet cum voto suscipiendi Sacramentum conjuncta sit,

extra casum necessitatis, aut martyrii sine actuali susceptione Sacramenti. Patet ex

- Prop. 67. Propositione 67. & 68. *Homo existens in peccato mortali sive in reatu aeternae damnationis potest habere Veram Charitatem & Charitas, etiam Perfecta, potest consistere cum reatu aeternae damnationis. Per Contritionem etiam cum Charitate Perfecta cum voto suscipiendi Sacramentum conjunctam non remittitur crimen extra casum necessitatis aut martyrii sine actuali susceptione Sacramenti.*
- Prop. 30. Item ex propositione 30. & 31. *Charitas Perfecta & sincera, quæ est ex corde puro & conscientia bona & fide non ficta tam in Catechumenis quam in pœnitentibus potest esse sine remissione peccatorum. Charitas illa quæ est plenitudo legis non est semper conjuncta cum remissione peccatorum. Quæ omnia nos negamus; adeoque quid commune cum hac doctrinâ habet Resolutio nostra?*
- Propos. 31.

An fortè omnis Charitas, quantumcunque tenuis, vel Dei Dilectio, quantumvis tenuis, est Perfecta Charitas? Ita quidem aliqui ex adversariis docent, at sine ullo fundamento, imo contradicentibus manifestè SS. Patribus & Tridentino Concilio ut ex dictis liquet. Possè enim Deum verè, sincerè & gratis propter seipsum, nullius etiam creaturæ, sed ipsius solius intuitu diligere, licet illa dilectio ad illam nondum pertingat perfectionem,

fectionem, sed in simpliciore & inferiori affectu hæreat, constans est Patrum doctrina, quam tradidit Tridentinum, quando inter dispositiones necessarias ad justificationem exigit à Catechumeno, ut *Deum tanquam omnis justitiæ fontem, diligere incipiat.* Quid enim est diligere Deum, tanquam omnis justitiæ fontem, quam diligere Deum, non propter rivos beneficiorum, ab ipso Deo, tanquam fonte, promanantes, sed Deum propter ipsum Deum diligere, & fontem propter ipsum fontem, propriamque bonitatem, ut notat Exim. P. Fervaquez in suâ quæstione quodlibeticâ de Attritione. Unde in talibus Catechumenis agnoscit S. Augustinus *Charitatem inchoatam*, quâ pro mensurâ Charitatis & Dilectionis incipiunt adjutorio gratiæ languidè caput è cæno peccatorum erigere, seque ad Deum convertere, & quodammodo fieri candidati justitiæ perfectæ, juxta illud S. Augustini: *Charitas inchoata, inchoata justitia est; Charitas provecta, provecta justitia est; Charitas magna, magna justitia est; Charitas perfecta, perfecta justitia est.*

6. 3.
Arg. 1.
fol. 8.

lib. de
nat. &
grat. cap.
70.

Hanc Imperfectam Charitatem, seu Dei Dilectionem & Amorem manifesta evincit ratio: sicuti enim Patrem nostrum terrenum possumus vero Amore propter ipsum amare, sic tamen ut ille

Amor non fit Amor perfectus, & per illum non amemus quantum à nobis amandus est; cur etiam tali Amore non possemus amare Patrem nostrum cælestem, Deum? Cur talis Amor verus Dei debet esse perfecta Dei Charitas? Possumus eum seorsim à creaturis considerare, nec ad eum comparare, & sic simplici tantum complacentiâ; castâ, quamvis tenui, summum illud bonum attingere.

Nec præsidium ullum contrariæ sententiæ ex Scripturâ Sacrà habetur, licet dicat: *Ego diligentes me diligo. Convertimini ad me, & ego convertar ad vos. Qui diligit me, diligetur à Patre meo, &c.* Fatemur enim quod Deus bonus ac misericors diligentes se indubitanter diligit. Cum enim gratis ac sine ullo merito dignetur sanctæ suæ Dilectionis inspirare affectum, cum adhuc tales peccatores essemus, ut planè adhuc à Deo aversi, nullo modo Deum diligere-remus; quidni & diliget illos, qui jam è fæce peccatorum caput erigere incipiunt, seque ad Deum convertere per dilectionem? Et hoc est quod docet S. Bernardus, cum ait: *Nemo itaque se amari diffidat, qui jam amat. Libenter Dei Amor nostrum, quem prævenit, subsequitur. Nam quomodo redamare pigebit, quos amavit & necdum amantes?* Sicuti autem

Proverb. 8.
Zachar. 1.
Ioan. 14.

Epist. 107
num. 8.

autem ex eo quod Deus amet peccatores nondum se diligentes inferri nequit, illos jam esse justificados; ita etiam ex eo quod Deus diligat se diligentes, non sequitur illos istâ Dilectione justificados, sed tum demum quando ista Dilectio ad tantam excrescit perfectionem, ut Deum diligant ex toto corde, totâ animâ, ex totâ mente, ex totis viribus. Diligit ergo Deus istos se diligentes quatenus ex parte suâ in illis continuat & perficit Dilectionis affectum, donec ad tantam perfectionem veniat, nisi homo ex parte suâ deficiat, illumque dilectionis affectum per mundi cupiditatem è corde expellat. Primò ergo peccatori adhuc toto affectu creaturis immerso Dilectionis *ipse dat occasionem*, postea *ipse creat affectionem*, & tandem *desiderium ipse consummat*. Ut ait Bernardus. lib. de Diligen. Deo.

Ad objecta ergo Scripturæ loca, uti & ad similia generaliter responderi debet; Non omni diligenti, omni se convertenti ad Deum remissionem promitti peccatorum, sed solum illis qui ex toto seu perfecto corde illud præstant. *Convertimini ad me*, ait Deus, **IN TOTO CORDE VESTRO in jejuniis, & in fletu, & in planctu. Cum quaesieris ibi Dominum Deum tuum, invenies eum, SI TAMEN TOTO CORDE QUÆSIERIS, & totâ tribulatione animæ tuæ. Quæretis me, Joëlis 2. v. 12.
Deut. 4. v. 29.
Jerem. 29. v. 13.**

*invenietis : CUM QUÆSIERITIS ME IN TO-
TO CORDE VESTRO.*

§. VI.

*An detur Charitas & ex eâ procedens
Contritio statâ & infallibili lege
justificans , etiam sine actuali sus-
ceptione Sacramenti, aut perpeffione
martyrii.*

Seff. 14.
cap. 4.

R Esp. Affirmativè & constat ex Con-
cilio Tridentino , quod hoc clarè
supponit , quando dicit : *Contritionem ali-
quando CHARITATE perfectam , hominemque
RECONCILIARE , PRIUSQUAM SACRA-
MENTUM ACTU SUSCIPIATUR.* Et patet
ex 68. propositione condemnatâ à Pio V.
& Gregorio XIII. quam §. præcedentẽ
citavimus. Liquet etiam ex illis S. Scri-
pturæ locis , quæ promittunt perfectæ di-
lectioni & conversioni peccatoris ex toto
corde &c. ad Deum , remissionem pec-
catorum. *Si revertamini & quiescatis, salvi eritis.*
Convertimini ad me & salvi eritis. Convertite nos,
& salvi erimus. Si impius egerit pœnitentiam
ab omnibus peccatis, vitâ vivet & non morietur.
Impietas impij non nocebit ei in quâcunque die con-
versus fuerit ab impietate suâ. Qui diligit me , di-
ligetur à Patre meo : & ego diligam eum , & ma-
nifestabo

Isaia c. 30.

& 45.

Psal. 79.

Ezech. 18.

Wid. c. 33.

Joan. 14.

nifestabo ei meipsum & ad eum veniemus,
& mansionem apud eum faciemus.

4. Supponit hanc sententiam Cate-
chismus Romanus, cum ait : *ut enim hoc*
concedamus contritione peccata deleri. p. 2. c. 5.
n. 32.

5. Probatur hæc ratione : Charitas
Perfecta & ex illa procedens contritio
indubiè habuerunt vim & efficaciam re-
conciliandi hominem cum Deo in Veteri
Lege, cum tunc nullum aliud reconcilia-
tionis remedium adultis relapsis suppete-
ret ; atqui illa vis & efficacia non est
adempta Contritioni ex Charitate Per-
fectâ procedenti in Novâ Lege, ergo etiam
adhuc infallibili lege illa Contritio justi-
ficat.

6. Confirmari potest hæc sententia ex
variis SS. Patrum locis, in quibus agnos-
cunt Charitatem infallibili lege justifica-
tem. Sic S. Augustinus ait : *Hæc est margarita*
speciosa Charitas : sine quâ nihil tibi prodest quod-
cunque habueris ; quam, si solam habeas, SUFFI-
CIAT TIBI. Si autem illa Charitas pecca-
torem non justificaret, quomodo suffi-
ceret homini illam solam habere ; cum
necdum peccatorum remissionem con-
secutus fuisset, adeoque adhuc obnoxius
foret æternæ damnationis reatui ? Ipsam
ergo *si solam habeas, sufficiat tibi : quia ipsa est*
via, quæ ducit per se ambulantes ad Patriam (ut

Exposit.
5. in Ep.
Ioan.

lib. 3. de
vitâ con-
templ.
cap. 13.

ait S. Prosper) & consequenter ad justificationem. Hinc & alibi S. Aug. ait : *Ipsa vero Dilectio, sive Charitas (nam unius rei est utrumque nomen) si habeat eam qui non loquitur linguis, nec habet Prophetiam, nec omnia scit Sacramenta; omnemque scientiam, nec distribuit omnia sua pauperibus, vel non habendo quod distribuat, vel aliquâ necessitate prohibitus, nec tradit corpus suum ut ardeat, si talis passionis nulla tentatio est, PERDUCIT AD REGNUM.* Deinde *Amor Dei, qui, teste S. Augustino & S. Prospero, facit Ierusalem, seu civitatem cælestem, indubité est Amor justificans; cum ex illo Amore colligat S. Prosper illum esse civem cælestis Ierusalem, qui istum habet.*

lib. 14. de
Civit.
cap. 28.
Prosp.
sent. 221.

2. In doctrina S. Augustini ipsamet Perfecta Charitas est Perfecta justitia, secundum illud : *Charitas inchoata, inchoata justitia est; Charitas provecta, provecta justitia est; Charitas magna, magna justitia est; Charitas Perfecta, Perfecta justitia est.* Quomodo ergo à Charitate Perfecta abesse potest justificatio, cum justificatio non sit aliud, quam Perfectæ justitiæ consecutio, perfecta autem Charitas sit ipsa perfecta justitia? Seu (ut loquitur S. Bernardus, vel quisquis est Author lib. de modo bene vivendi ad Sororem cap. 4.) *Perfecta sanctitas?*

De Nat.
& Grat.
cap. 70.

Confirmatur hæc sententia ex S. Bernardo

nardo, dicente: *Anima reditus, conversio ejus ad verbum, reformanda per ipsum, conformanda ipsi. In quo? In Charitate. Ait enim: estote imitatores Dei, sicut filii charissimi, & ambulate in Dilectione, sicut & Christus dilexit vos. Talis conformitas MARITAT ANIMAM VERBO, cum,* *Ephes. c. 5.*
cui videlicet similis est per naturam, similem nihilominus ipsi se exhibet per voluntatem, diligens sicut dilecta est. Ergo SI PERFECTE DILIGIT, NUPSI *Quid hac conformitate jucundius? Quid optabilius charitate? Quam sit ut humano magisterio non contenta, per temet, o anima, fiducialiter accedens ad verbum, Verbo CONSTANTER IN-*
HÆREAS, verbum familiariter percuncteris consultesque de omni re, quantum intellectu capax, tantum audax desiderio. Verè spiritualis sanctique connubii contractus est iste. Parum dixi, contractus; complexus est. Complexus planè, ubi idem velle, & nolle idem, unum facit Spiritum de duobus. Quomodo clarius & efficacius potuit exprimere Charitatis Perfectæ vim & efficaciam justificandi? Nonne illa Charitas justificat & reconciliat hominem Deo quæ maritat animam verbo, quâ Diligens Deo nubit, quâ verbo constanter inhaeret, quâ familiariter cum verbo conversatur, quâ verbum completitur, quâ homo sit unus cum Deo spiritus, habens idem velle & nolle cum Deo? Illa autem juxta Bernardum præstat Charitas Perfecta.

Hinc

Enarrat.
2. in
Psal. 31.

Huic Melliflui Doctoris loco adjungi potest locus S. Augustini, scribentis in illud Psalm. 31. *Dixi Pronuntiabo adversum me injustitias meas Domino, & tu remisisti impietatem cordis mei.* Ait: *Dixi. Quid dixisti?* Non jam pronuntias, sed promittis se pronuntiaturum, & ille jam dimittit. Attendite fratres, magna res, *Dixi: pronuntiabo.* Non dixi, pronuntiavi, & tu dimisisti. *Dixi pronuntiabo, & tu dimisisti: quia eo ipso quod dixit, pronuntiabo, ostendit quia nondum pronuntiaverat, sed corde pronuntiaverat.* Hoc ipsum dicere pronuntiabo, pronuntiare est, ideo & tu remisisti impietatem cordis mei. Confessio vero mea ad os nondum venerat. *Dixeram enim, pronuntiabo adversum me, verumtamen Deus audivit vocem cordis mei. Vox mea in ore nondum erat, sed auris Dei jam in corde erat. Tu remisisti impietatem cordis mei, quia dixi pronuntiabo.*



§. VII.

Proponitur Sententia, quæ tenet requiri ad Sacramentum Pœnitentiæ Contritionem Perfectam ex Charitate Perfectâ procedentem, quæ justificat sine Sacramenti actuali susceptione, & fertur de illâ judicium Authoris.

Sententiam hanc in Concilio Tridentino, teste Cardinale Pallavicino, tenuit & defendit Joannes Æmilianus Hispanensis, Tudetanus Antistes. Eandem sententiam apud Tannerum tenent Hugo & Richardus Victorinus, Alensis, Alfiodorensis, Bonaventura, Argent, Gabriel, Marsilius, Abulensis, Medina, And. Gandavensis, Ferrariensis, Cajetanus & alii. Unde & Lopez testatur hanc esse opinionem antiquorum, cui opinioni variis in locis videtur subscribere Angelicus Doctor; quæ loca hic subjiciemus. Dicit ergo I. *Dicendum, quod CONFESSIO PRÆSUPPONIT CHARITATEM, QUÆ QUIS VIVUS EFFICITUR Contritio autem est in quâ datur Charitas. Et iterum: Quantum ad fructum confessionis, illum nullus extra Charitatem existens percipit. Ubi agit de Charitate, quæ est*

In Historiâ Conc.
lib. 12.
cap. 10.

tom. 4.
disp. 6.
quæst. 6.
dub. 4.

In Supplement.
quæst. 7.
art. 1.
ad 2.

Ibidem
q. 9. art. 1.
ad 1.

Ibidem
ad 2.

est animæ vita , uti ex objectione , ad quam respondet , liquet. Et postea : *Dicendum quod contritio & satisfactio fiunt Deo , sed confessio fit homini : & ideo de ratione contritionis & satisfactionis est , quod homo SIT DEO PER CHARITATEM UNITUS.* Nec obest quod immediatè post subjiciat ; *non autem de ratione confessionis.* Quia licet sine illâ contritione dicat posse subsistere validam confessionem tenet tamen sine illâ contritione confessionem esse informem , seu sine fructu & effectu. Et quæst. 10. *Dicendum quod confessio operatur præsuppositâ CONTRITIONE , QUÆ CULPAM DELET.* Eandem doctrinam in variis suis opusculis etiam docet , & 1. in opusculo de formâ Absolutionis , ubi sibi format hanc objectionem , quæ est objectio septima , *quod in suscitatione Lazari secundum Augustinum & Gregorium significata est suscitationis peccatorum præperatio , quia Lazarus est primus à Domino vivificatus , quàm traderetur discipulis absolvendus.* Ad quam respondet *per hoc ergo non ostenditur quod Sacerdos non absolvat , aut non debeat dicere , ego te absolvo ; sed quod non debeat absolvere , in quo signa contritionis non videt , per quam homo iustificatur interius à Deo culpâ remissâ.* Item in Opusculo , cujus titulus Expositio Dominicæ orationis. Ad petitionis quintæ expositionem dicit : *Circa secundum ,*

Ibidem
q. 10.
art. 5.
in corp.

secundum, quomodo impleatur hæc petitio, sciendum est, quod in peccato sint duo, scilicet culpa, quâ offenditur Deus, & pœna quæ debetur pro culpa: sed culpa remittitur in contritione, quæ est cum proposito confitendi & satisfaciendi. Psalm.

31. *Dixi: confitebor adversum me iniquitatem meam Domino, & tu remisisti impietatem peccati mei. Non est igitur desperandum, ex quo ad remissionem culpæ sufficit contritio cum proposito confitendi. Sed fortè quis dicet, ex quo dimittitur peccatum in contritione, ad quid necessarius est Sacerdos? Ad hoc dicendum est, quod Deus in contritione dimittit culpam, & pœna æterna commutatur in temporalem, sed nihilominus manet adhuc obligatus ad pœnam temporalem, unde si discederet sine confessione, non contempta tamen, sed præventa, iret ad purgatorium, cuius pœna, sicut dicit Augustinus, est maxima. Quando ergo confiteris, Sacerdos absolvit te de hac pœna in clavium virtute, cui te subjeceris in confessione: & ideò dixit Christus Apostolis, Ioan. 20. Accipite Spiritum sanctum, quorum remiseritis peccata, remittuntur eis*

Sic ergo dimittuntur peccata non solum quantum ad culpam in contritione, sed etiam quantum ad pœnam in confessione. Hisce adde id quod habet Angelicus Doctor in suâ Summâ: Requiritur ad rationem veræ Penitentiae ut displiceat peccatum, quia EST CONTRA DEUM SUPER OMNIA DILECTUM. Ruminant hæc præceptoris sui loca illi Thomistæ, qui tenent

Attri-

3. p. q. 86.
art. 3. in
corp.

Attritionem ex puro puto gehennæ metu sufficere ad justificationem cum Sacramento, & videbunt quam longè discrepent ab Angelici Doctoris mente, quamque sint degeneres in hoc puncto discipuli. Quod & magis patebit, si legant Germanum Philaletem de Contritione.

Ratio hujus sententiæ posset allegari, quod in *lege Amoris* non minor requiratur Charitas ad justificationem, quam in *lege Timoris*; atqui in *lege Timoris* nunquam adultus, in mortale lapsus, fuit justificatus sine contritione Perfectâ ex Charitate Perfectâ procedente; ergò etiam in *lege Amoris* nunquam aliquis pertingere potest ad justificationem sine Charitate Perfectâ.

Minor est certa. Major autem, in qua est difficultas, hoc modo probari posset, quia videtur inordinatum & quodammodo evertere discrimen utriusque legis, quod teste S. Augustino est *Timor & Amor*, si Deus in *lege Timoris* à servis, in ordine ad justificationis gratiam obtinendam, majorem sui Dilectionem seu Charitatem exegerit, quam in *lege Amoris* exigit à filiis. Exegisset autem, si illi nunquam potuissent pertingere ad justificationem sine Charitate Perfectâ, si verò possint.

Quid mihi in hac sententiâ videatur, breviter

breviter sequentibus conclusionibus aperiam, unde.

Dico 1. Sententia hæc, quæ docet contritionem perfectam requiri ad justificationem, etiam cum Sacramento, sine notâ gravis censuræ, adhuc potest defendi.

Probatur, quia neque ex S. Scripturâ, neque ex Conciliis, neque ex SS. Patribus ostendi potest ejus sententiæ falsitas, & ab alterâ parte defenditur adhuc à Catholicis Doctoribus, qui illam rationibus probabilibus stabiliunt.

Quantum ad S. Scripturam, ex illâ bene habemus, quod *impietas impij non nocebit ei in quâcumque die conversus fuerit ab impietate suâ. Quod si impius egerit pœnitentiam ab omnibus peccatis, vitâ vivet, & non morietur.* Quod *qui diligit me diligetur à Patre meo, & ego diligam eum, & manifestabo ei meipsum, ut ait Christus:* At exinde tantum inferri potest Contritionem ex Charitate Perfectâ procedentem semper justificare, quod istius sententiæ Authores libenter admittunt.

Ezech. 33.

Ibid. c. 14.

Joan. 11.

Solum videri alicui posset hæc sententia proscripta esse à Concilio Tridentino Sessione 14. in quâ docet: *Contritionem aliquando Charitate Perfectam esse, hominemque reconciliare priusquam Sacramentum actus suscipiatur.* Et antea cap. 3. in quo dicit, quod

Trident. Sess. 14. cap. 4.

cap. 3.

C effectus

effectus Sacramenti Pœnitentiæ, *quantum ad ejus vim & efficaciam pertinet, sit Reconciliatio cum Deo.* Denique cap. 6. declarat quod Absolutio Sacramentalis, *non sit solum nudum ministerium declarandi remissa esse peccata, sed ad instar actus judicialis, quo ab ipso Sacerdote velut à judice sententia pronuntiatur.* Et ibidem antea docet: *Sacerdotes, tamquam Christi ministros, functionem remittendi peccata exercere.* Si enim Contritio perfecta requireretur cum Sacramento, vel sequeretur quod illa non justificaret sine actuali Sacramenti susceptione, adeoque falsus esset primus locus è Tridentino allegatus, vel si justificet (ut jam supponitur) sequitur hominem semper jam esse justificatum antequam Sacramentum Pœnitentiæ suscipiat, & consequenter falsa forent tria posteriora loca ex Concilio deprompta. Quomodo enim Sacramenti Pœnitentiæ effectus posset dici reconciliatio peccatoris cum Deo, si homo semper jam sit reconciliatus cum Deo antequam Sacramentum hoc suscipiat? Et quomodo Sacerdotes tanquam ministri Christi exercent functionem remittendi peccata, si peccata jam sint ante absolutionem remissa?

Loca hæc & similia moverunt Authores Catechismi Romani, ut dicerent de fide esse Contritionem perfectam non requiri

quiri cum Sacramento Pœnitentiæ ad justificationem. Cum enim dixissent Contritione perfectâ deleri peccatum, sed rarò peccatorem illam elicere, subjiciunt :

Etenim ex Fidei Catholica Doctrinâ omnibus credendum, & constanter affirmandum; si quis ita animo affectus sit ut peccata admissa doleat, simulque in posterum non peccare constituat, etsi ejusmodi dolore non afficiatur, qui ad impetrandum veniam satis esse possit; ei tamen, cum peccata Sacerdoti ritè confessus fuerit, ut clavium scelera omnia remitti ac condonari: ut merito à Sanctissimis Viris Patribus nostris celebratum sit, Ecclesiæ clavibus aditum in calum aperiri. De quo nemini dubitandum est, cum à Concilio Florentino decretum legamus Pœnitentiæ effectum esse absolutionem à peccatis.

Catechif.
Roman.
p.2. c.5.

Verum totum agmen ex Tridentino productum uno veluti halitu diffilat fidelissima historia Concilii Tridentini supra laudata, ex quâ perspicuè colligitur Ioannis Æmiliani Hispalensis Tudetani Antistitis sententiam à censurâ immunem transivisse, prout sufficienter liquet ex illis, quæ Eximius P. Fervaquez in suo tractatu de mente Concilii Tridentini circa Attritionem ex gehennæ metu conceptam, deprompto ex historiâ Pallavicini citatâ, & ex aliis Tractatibus, quos postea idem Exim. Pater conscripsit pro illius Tractatus defensione. Cum enim formatum fuisset

set Decretum, in quo dicebatur Attritionem ex servili gehennæ metu sufficere ad Sacramenti Pœnitentiæ Constitutionem, ad instantiam Tudetani Antistitis decretum illud reformatum est illo modo quo jam exprimitur Sess. 14. cap. 4. idque ne officeret ejus doctrinæ : officeret autem maximè, si illius sententiam Anathemate feriret.

Deinde quod in citatis verbis ex Tridentino Concilio non sit condemnata illa sententia, clarissimâ ratione ostendi potest. Ex eo enim quod jam remissa sint peccata ante absolutionem, nullo modo sequitur quod effectus absolutionis non sit reconciliatio hominis cum Deo, absolutio non sit actus judicialis, & functio remittendi peccata : primò quia certum est ex fidelium praxi, quod peccata mortalia semel clavibus subjecta & directè absoluta seu remissa iterum quis possit confiteri, absque eo quod ullum novum superaddat peccatum ; an non tunc remissa sunt peccata ante absolutionem ? Et tamen eo non obstante effectus Absolutionis tunc datæ est Reconciliatio hominis cum Deo, & absolutio est actus judicialis, & functio Remittendi Peccata. Secundò aliquandò saltem pœnitens perfectè est contritus antequam ad Sacramentum

tum

tum accedit & consequenter jam Remissionem peccatorum obtinuit. An in illo casu eo non obstante non manet effectus Sacramenti Pœnitentiæ Reconciliatio hominis cum Deo, & absolutio actus judicialis & functio Remittendi Peccata? Si ergò in istis casibus maneant, cur non manerent, licet semper forent peccata remissa.

Quomodo autem Sacramentum in illo casu remittat peccatum, insinuat in Concilio Tridentino Joannes Æmilianus. Cum enim dixisset cum Sacramento *opus esse Contritione perfectâ*, mox subjungit: *Nec tamen hinc argui per Sacramenta peccata non remitti, quippè quæ Sacramentum jam invenit remissa præcuntis Contritionis efficacitate. Si quidem ipsa Contritio id præstat virtute Sacramenti, cujus votum in eâ continetur.*

Deinde etiam à posteriori colligitur hanc sententiam à Tridentino non esse damnatam ex eo, quod, teste Morino, non tantum plurimi Theologi hanc sententiam docuerint ante Concilium Tridentinum, sed & viri graves & celebres eandem Doctrinam amplexi fuerint & propugnauerint post Concilium Tridentinum. Quorum aliqui Concilio Tridentino interfuerunt, teste Eximio P. Fer-
yquez in vindiciis veritatis & Charitatis

De Pœ-
nit. lib. 9.
cap. 11,
num. 8,

Theſi 4. inter quos numerat Petrum à Soto, Sonnum, Richardotum, & Fredericum Nauſeam. Quis autem dicet, viros illos graves, celebres ac Doctos, quibus mens Concilii optimè perſpecta fuit, docuiſſe ſententiam à Concilio condemnatam?

Quantum autem ad Catechiſmi Romani authoritatem, licet illa indubiè magna ſit ac major quam particularis aliqujus Doctoris, equidem non eſt tanta quin impunè & citra notam cenſuræ liceat ab illâ diſſentire, prout paſſim videmus varios authores contrarium ejus, quod in illo Catechiſmo docetur, defendere abſque ullâ temeritatis notâ, præſertim quando aliundè magna authoritas contrarium ſuadet, prout hîc ſit.

Ex hâc doctrinâ notandum hoc Corollarium deduci poteſt. 1. Quod ſi doctrina exigens Contritionem perfectam cum Sacramento Pœnitentiæ non ſit condemnata à Concilio; multò minus proſcripta ſit illa ſententia, quæ tantum requirit Attritionem ex aliquo Dei propter ſe, licet imperfecto, Amore, cujus contrarium quidam Recentiores ſine ullo fundamento defenderunt antequam decretum Alexandri VII. anno 1667. prodiit, quod noſtram ſententiam, cenſurari prohibuit.

Dico

Dico 2. licet huic sententiæ non defit sua probabilitas , tamen probabilius & verius judico non requiri Contritionem perfectam , quæ justificet priusquam Sacramentum hoc actu suscipiatur , cum Sacramento.

Ratio est quia si illa requireretur , jam paucissimi verè absolverentur , cum perfecta illa Contritio rarò habeatur ; *ut etiam hoc concedamus* , inquit Catechismus Romanus , *Contritione peccata deleri , quis ignorat ; illam adeo vehementem , acrem , intensam esse oportere , ut doloris acerbitas cum scelerum magnitudine equari conferrique possit ? At quoniam pauci ad hunc gradum pervenirent , fiebat etiam ut à PAUCISSIMIS hæc viâ peccatorum venia speranda esset . Quare necesse fuit ut Clementissimus Dominus faciliore ratione communi hominum saluti consulere : quod quidem admirabili consilio effecit cum claves regni celestis Ecclesiæ tradidit . Et verè si iudicium primitivæ Ecclesiæ , quæ à Christo , ejusque Apostolis edocta & necdum tot vitiis prægravata , sed magnâ adhuc Charitate flagrans optimè de fide & moribus judicavit consulamus , clarissimè videbimus tot ab ipsa fuisse postulata doloris signa , pœnitentiæ fructus tot lachrymas & gemitus , tot jejunia , humicubationes &c. ad condignam suorum peccatorum pœnitentiam & Absolutio-*

lutionem, ut ex illis satis colligatur quod non tam facilè quis veram ac perfectam suorum peccatorum Contritionem ac pœnitentiam eliciat ac multi sibi persuadent. Unde Patres quandoque ita loquuntur quasi talis Contritio nunquam, aut ferè nunquam, concipiatur, adeoque extra mortis articulum nunquam quis sine actuali Sacramenti susceptione & adminiculo ad justificationem pertingere possit; sic S. Augustinus agens de Catechumenis qui etiam in assiduo jejunio, oratione, vigiliis cervicum inclinatione, aliisque pœnitentiæ operibus illo tempore exercebantur, tamen dicit: *Quantumcumque Catechumenus proficiat, adhuc sarcinam iniquitatis suæ portat, non illi dimittitur, nisi veniat ad baptismum.* Similia habet multis aliis in locis quæ infra expendemus.

Tract.
13. in
Euangel.
Ioan.

Ratio secunda est. Si absolutio semper præsupponeret Contritionem justificantem, tunc Sacramentum Pœnitentiæ non esset Sacramentum mortuorum, sed vivorum, cum sic foret institutum à Christo ut non nisi à veris Christi membris suscipi posset.

Ratio tertia est, Quod hæc sententia videatur nimium enervare vim & efficaciam Sacramenti Pœnitentiæ, & propriè loquendo effectus hujus Sacramenti, quos

quos ipsi Tribuunt Concilium Florentinum & Tridentinum, revera ipsi non competerent si semper Pœnitentes deberent esse justificati antequam hoc Sacramentum actu suscipatur, tunc enim nunquam propriè loquendo hominem peccatorem Deo reconciliat, peccata dimittit, aditum in cælum aperit. Aliud est si Sacramentum pœnitentiæ ordinariè hoc faciat, licet per accidens in duobus casibus supra allatis non ita propriè tum hoc faciat.

Hinc cum quidam Theologus in libro à se edito docuisset: *Attritionem de peccatis insufficientem esse pro accipiendâ remissione Peccatorum in Sacramento Pœnitentiæ, Contritionemque ex Charitate perfectâ esse ad id necessariam & Absolutionem Sacramentalem nihil aliud esse quam declarationem juridicam peccati jam remissi*: Facultas Theologica Parisiensis anno 1638. totum hoc hâc censura notavit: *Quæ tradit de Attritionis insufficientiâ, & Contritionis ex perfectâ Charitate absolutâ necessitate ad recipiendum pœnitentiæ Sacramentum: & quæ addit de Absolutione, quod nihil aliud sit quàm declaratio juridica peccati jam remissi; damnavit facultas, & censuit has propositiones esse quietis animarum perturbativas, Communi & omninò tutæ praxi Ecclesiæ contrarias, efficaciæ Sacramenti pœnitentiæ imminutivas & insuper temerarias, ac erroneas. Prout refert Isambertus disp. 14. de Sa-*

cramento Pœnitentiæ art. 6. qui eidem censuræ interfuit & subscripsit, & ex illo Ludovicus Abellii in medulla Theologicâ part. 2. tract. 1. cap. 5.

§. VIII.

Proponitur sententia quæ in adultis, post promulgatam perfectè novam legem, extra casum martyrii, actualem Sacramenti susceptionem ita esse necessariam tenet, ut sine illa nullo modo è statu peccati ad statum gratiæ seu justificationis pertinere possint, & refertur de eâ SS. Patrum judicium.

lib. 4.
cap. 18.

Sententiam illam tempore S. Bernardi defendit Otto Frisingensis Episcopus in generali totius mundi historiâ, & cum ipso varii alii antiqui eandem docuerunt sententiam, & circa illam acriter olim disputatum fuit inter Patres. Verum contrariam sententiam olim clarè docuerunt S. Ambrosius de obitu Valentiniani secundi Imperatoris qui ab ipso Catecumenus factus antequam gratiam Baptismi perciperet morte præventus est, & S. Augustinus, cumque utriusque authorita-
tem

tem adferat S. Bernardus, ejus judicium circa hanc quæstionem hic adferemus, scribens ergo ad Hugonem de S. victore contra prædictum Ottonem Frisingensem Episcopum ait; *In majori ætate quisquis post vulgatum ubique Baptismi remedium renuit jam Baptizari, generali originalique macula addit & ex proprio crimen superbiæ, duplicem secum portans justissimæ damnationis causam, si sic de de corpore exire contigerit. Tamen si ante exitum respuerit, & voluerit & petierit Baptizari, sed mortis præoccupatus articulo fortè obtinere nequiverit, dum non desit fides recta, spes pia, Charitas sincera, propitius sit mihi Deus, quia huic ego ob solam aquam si defuerit, nequaquam omnino possum desperare salutem, nec vacuam credere fidem, nec confundere spem, nec excidere Charitatem, tantum si aquam non contemptus, sed sola (ut dixi) prohibeat impossibilitas. Si quis aliter sapit, viderit inde sibi, quod asserit, persuaserit, nam me non facile fateor assentire, si non firmior induxerit vel ratio ad intelligendum, vel ad credendum Authoritas.*

Sed miror Admodum, si novus iste novarum inventarum assertionum, & assertor inventionum, invenire in hoc rationem potueris quæ sanctos Patres latuerit Ambrosium & Augustinum, sive auctoritatem eorundem auctoritate potiore. Nam si nescit uterque idem profecto sensit, quod fatemur sentire & nos. Librum certè Ambrosii de morte Valentiniiani legat si non legit; recolas si jam legit; non dissimulet si recolit;

&

Epist. 77^a
habetur
in edit.
Colon.
tom. 4.

44 DISQUISITIO.

lib. 4.
contra
Donat.
cap. 22.

& advertet sine dubio Sanctum homini non Baptizato & mortuo fidenter de solâ fide salutem præsumere, & tribuere indubitanter bonæ voluntati, quod defuit facultati. Legat & Augustini contra Donatistas de unico baptismo librum quartum, & se vel agnoscat imprudenter deceptum vel probe impudenter obstinatum. Baptismi, inquit, vicem aliquando implere passionem, de latrone illo, cui non baptizato dictum

Lucæ. 23. est: hodie mecum eris in paradiso: Beatus Cyprianus non leve documentum assumit. Et addit. Quod etiam atque etiam considerans, invenio, inquit, non tantum passionem pro nomine Christi, id quod ex baptismo deerat posse suppleri, sed etiam fidem conversionemque cordis, si forte ad celebrandum mysterium baptismi in angustiis temporum succurri non potest. Et infra. Quantum itaque, ait, valeat etiam sine visibili Sacramento Baptismi, quod ait Apostolus: corde creditur ad justitiam, ore autem confessio fit ad salutem, in illo latrone declaratum est. Sed tunc, inquit, impletur invisibiliter, cum mysterium Baptismi non contemptus religionis, sed articulus necessitatis excludit. Et quidem non ignoro retractare ipsum id quod posueras testimonium de latrone, minusque idoneum ad comprobandam illam sententiam confiteri, eo quod sanè incertum sit utrumnam fuerit.

Rom.
10.

lib. 2.
Retract.
cap. 18.
¶ 55.

fuerit baptizatus. Cæterum sententiam & audacter
 prosequitur, & multipliciter confirmat, nec uspiam
 (nisi fallor) retractasse reperies. Item in alio loco lib. 3. q.
 q. in Le-
 vit. c. 34. Augustinus, cum aliquos præmisisset, quos scriptura
 commemorat invisibiliter quidem, non tamen
 etiam visibiliter sanctificatos, tandem infert: ex
 his colligitur aut invisibilem sanctifica-
 tionem quibusdam affuisse & profuisse
 sine visibilibus Sacramentis, quæ pro
 temporum diversitate mutata sunt, ut
 alia tunc fuerint, & alia modo sint. Et
 paulo post. Nec tamen, inquit, visibile Sa-
 cramentum omninò contemnendum, nam
 contemptor ejus invisibiliter sanctificari
 non potest. Vbi satis evidenter ostendit fidelem
 & conversum ad Dominum, non si nequivit, sed
 si contempserit baptizari, fructu privati baptis-
 matis.

Ab his ergo duabus columnis (Augustinum lo-
 quor & Ambrosium) crede mihi difficile avellor
 Cum his inquam, me aut errare aut sapere fateor:
 credens & ipse solâ fide hominem posse salvari, cum
 desiderio percipiendi Sacramentum: si tamen pio
 adimplendo desiderio mors anticipans, seu alia qua-
 cumque vis invincibilis obviarit.

Quæ autem Baptismatis, eadem Re-
 conciliationis est ratio teste eodem Melli-
 fluo Ecclesiæ Doctore cum ait: Si forte In medi-
 tationi-
 bus cap.
 9. tom. 5. peccator verè pœniteat sed intercurrente articulo
 necessitatis, ad confessionem pervenire non pos-
 sit:

fit: confidenter credere debemus, quod summus Sacerdos complet in eo quod mortalis non potuit. Et jam apud Deum factum constat, quod homo quidem verè voluit, sed non valuit adimplere, quia confessionem non contemptus exclusit, sed impedivit necessitas.

Hæc fuit Antiquorum probabilior sententia quæ jam apud Orthodoxos indubitata est, quam & olim varia Concilia validè confirmarunt sic synodus quarta
 cap. 79. Carthaginensis ait: *Pœnitentes, qui attende leges Pœnitentiæ exequuntur; si casu in itinere vel in mari mortui fuerint ubi eis subveniri non possit, memoria eorum & orationibus, & oblationibus*
 cap. 2. *commendetur. & prima vascensis: Pro his qui Pœnitentiâ accepta in bono vitæ cursu satisfactoria compunctione viventes, sine Communionem inopinato nonnunquam transitu in agris aut itineribus præveniuntur, oblationem recipiendam & eorum funera ac deinceps memoriam Ecclesiastico affectu prosequendam. Nec refert quod Consilium ibi tantum dicat SINE COMMUNIONE, quia nihil certius illi qui vel à limine SS. Patres salutavit quam quod illi per Communionem sæpius intelligant Sacramentalem Absolutionem prout observat Eminentissimus Cardinalis Bona vir in antiquitate & Theologia verè Eminentissimus, in suo doctissimo libro de rebus Liturgicis lib. 2. cap. 8. & etiam novissime Eximius Dominus ac M. N.*
 Gummarus

Gummarus Huygens in Apologiâ pro suâ Methodo §. 3. Unde & absolutionem in vitæ extremo *Datum viaticum* vocat Nycena Synodus, dum sanxit, *ut si quis egreditur de corpore, ultimo & necessario viatico minimè privetur.* Per Communionem ergo vascensis Synodus citata intelligit Sacramentalem Absolutionem; agit enim ibidem de illo, qui, uti habuit veteris Ecclesiæ praxis, suam peragebat satisfactionem ante Absolutionem & tempore pœnitentiæ seu satisfactionis fortuitò nondum acquisitâ Sacramentali Absolutione ex hâc vitâ decedit; satisfactionem enim olim fuisse præmissam Sacramentali Absolutioni, non, nisi qui in Antiquitate peregrinus est ignorat & luculentè probat mox laudatus D. Huygens Apologiæ suæ §. 2.

§. IX.

Proponitur sententia eorum qui extracasum martyrii & articulum mortis numquam de factò aliquem justificari asserunt sine actuali sacramenti perceptione, & fertur de illa judicium.

IN præcedenti §. vidimus veriorē ac modo certam Patrum Doctrinam esse
in

in casu martyrii ac articuli mortis hominem solâ perfectâ Charitate cum Sacramenti voto posse justificari, verum quid extra illos casus fiat gravior inter Patres fuit disceptatio; & quidem SS. Patres multum videntur inclinari in illam sententiam quod sine juncto concursu Contritionis & Sacramenti nemo regulariter justificetur, ut loquitur Eximius P. Lupus Doctor Lovaniensis vir in Canonibus; SS. Patribus ac Antiquitate nescio an ulli secundus in sua dissertatione dogmaticâ de Contritione & Attritione cap. 7. nam S. Aug. agens de Catechumenis divinâ Charitate flagrantibus, qui mirè in Pœnitentiæ operibus se exercebant, omnia sua pauperibus erogabant, sæculo renuntiabant & Monachatum arripiebant & multa pro nomine Christi patiebantur tamen de illis dicit: *Omnia peccata super illos sunt, & nisi venerint ad salutarem Baptismum, ubi peccata solvuntur, cum omni suâ excellentia non possunt intrare in regnum celorum. Et iterum. Quantumcumque Catechumenus proficiat, adhuc sarcinam iniquitatis suæ portat, non illi dimittitur, nisi venerit ad Baptismum.* Unde & de semetipso, quem tamen divinâ dilectione & Peccatorum Contritione insigniter ante Baptismum arsisse ex propriâ ejus confessione scimus dicit: *illa me secutum non faciebas*

Tract. 4.
in Euang.
Ioan.

Tract. 13.
in Euang.
Ioan.

lib. 9.
Confess.
cap. 4.

faciebat de præteritis peccatis meis, quæ mihi per baptismum tuum remissa nondum erant. Et antea cap. 2. ejusdem libri: Nonne & hoc peccatum cum cæteris horrendis & funereis in aquâ sanctâ ignovisti & remisisti mihi? Rationem à priori hujus sententiæ dat S. Augustinus quando asserens cordis conversionem & baptismatis Sacramentum esse duas invicem necessarias humanæ justificationis concausas dicit: *Alterum sine altero parum est, utrumque perficit æternæ possessionis hæredem.* Et in libro de unitate Ecclesiæ cap. 22. *Virumque necessarium est ad Dei regnum capeßendum, & baptismus & iustitia.* Et Tertullianus in libro de Baptismo cap. 13. *Vi fides aucta est credendi in Nativitatem, Passionem, Resurrectionemque Christi Domini, addita est ampliatio Sacramento, obsignatio baptismi, vestimentum quodammodo fidei, quæ retrò in Antiquo Testamento, erat nuda, nec potest jam justificare sine sua additi Baptismi lege.* Hæc & plura alia congerit ibidem citatus Eximius Pater.

lib. 4. de
Baptismo
contra
Donat.
cap. 21.

Quid nobis hæc in sententiâ videatur breviter declarabo. Unde.

Dico 1. Juxta supradicta §. Contritio perfecta quodocunque elicitæ reconciliat hominem peccatorem Deo.

Dico 2. Potest haberi extra articulum mortis & casum martyrii Contritio per-

D

fecta

fecta, & consequenter justificatio. Lique-
etiam ex dictis, quia omnino indubita-
tum est quod in veteri lege sæpius fuerit
elicitæ extra casum martyrii aut articuli
mortis Contritio ex Charitate perfecta
hominem mox Deo reconcilians, ergo
& in lege nova, in quâ Deus abundantius
in fideles effundit suæ gratiæ & Charita-
tis thesauros, eadem Contritio haberi po-
test extra illos casus, nam *non est abbreviata*
manus Domini ut salvare nequeat, neque aggre-
vata est auris ejus ut non exaudiat. Si habeatur
extra illos casus Contritio perfecta, ergo
& justificatio, institutio enim Sacramenti
non abstulit Contritioni illam efficaciam,
quam ante habuit, mox justificandi pec-
catorem, sed tantum hoc effecit ut sine
illo vel ejus voto Contritio perfecta ha-
beri non possit quod votum in omni Con-
tritione perfectâ saltem implicite includi-
tur. Confirmationem hujus vide in §.

Confirmatur hæc sententia exemplo
S. Martini, qui videtur justificatus extra
illos casus ante actuale Baptismi per-
ceptionem, quando illum heroicum cha-
ritatis erga proximum actum propter
Deum clicuit, dando pauperi mediam
chlamydis suæ partem, quantum enim
actio illa Deo placita fuit, ostendit,
quando teste S. Bernardo *miser ricordiam ejus*

in

THEOLOGICA. 51

in paupere se expertum Salvator ipse apud Angelos gloriabatur, datam sibi medietatem vestis ostentans. Et quando Christus Martino sequenti nocte post factum dimidiatâ illâ veste indutus apparuit, hanc mittens vocem: *Martinus Catechumenus hâc me veste contexit.* Quod & in aliis Catechumenis fuisse factum mihi certò persuadeo & in S. Augustino factum puto; cum tamen paucissimi ad illam Charitatis perfectionem Catechumeni pervenirent, nullique sine speciali Dei revelatione certò constare possit se ad talem Charitatis perfectionem pervenisse, meritò S. Augustinus dixit quod illa Charitas, quam in se experiebatur, *se securum non faciebat de prateritis peccatis suis quæ ipsi per baptismum nondum remissa erant.* Quodque postquam Baptizatus esset fugerit ab ipso sollicitudo vitæ prateritæ. Securiori enim indubiè modo per actualis Sacramenti auxilium quis peccatorum remissionem acquirit, quam per solam Contritionem.

Confirmatur 2. Quando Pontifices hanc proscripserunt propositionem: *per Contritionem etiam cum Charitate perfectâ, & cum voto suscipiendi Sacramentum conjunctâ, non remittitur crimen extra casum necessitatis aut martyrii sine actuali susceptione Sacramentorum*, indubiè supposuerunt talem Contritionem cum Sacramenti voto extra illos casus dari

D 2

posse

posse, cum alias frustra illam propositionem condemnassent, si dari tunc possit, etiam tunc justificat: ut ex dictis constat.

Confirmatur 3. Quia loca S. Scripturæ, SS. Patrum & Concilii Tridentini quæ insinuant Contritionem perfectam justificare non restringunt ad casum martyrii aut articuli mortis, sed absolute, generaliter & indeterminatè loquuntur ergo & nos illa dicta restringere non debemus. Et quantum ad Tridentinum quando illud dicit: *Docet præterea etsi Contritionem hanc aliquando Charitate perfectam esse contingat, hominemque Deo reconciliare priusquam Sacramentum hoc actu suscipiatur*: Tunc illa particula, *quando*, non afficit vocem, *reconciliare*, sic ut sensus sit, Contritionem hanc Charitate perfectam esse contingit, tuncque aliquando hominem justificare seu reconciliare Deo; sed afficit illas particulas, *Charitate perfectam esse contingit*, sic ut sit sensus: contingit Contritionem hanc, antea à Tridentino descriptam in initio capitis quarti, aliquando Charitate perfectam esse, tuncque hominem Deo reconciliare, quandocumque hoc fit.

Sess. 13.
cap. 7.

Confirmatur 4. Quia Tridentinum permittit Sacerdotibus in mortali peccato existentibus si illis desit copia confessoris urgente necessitate celebrare Missam modo
do

do præviè conati fuerint elicere perfectam Contritionem, ergo Patres Concilii judicarunt quod per illam Contritionem tunc, saltem aliquandò, justificationis gratiam obtinere possent, cum scirent ad hoc Sacrosanctum & divinissimum Sacramentum quod ipsum puritatis fontem in se concludit, non nisi sanctè cum magna puritate esse accedendum, hoc enim antea insinuat Concilium quandò in initio citati capitis dicit: *Si non decet ad sacras illas functiones quempiam accedere nisi sanctè; certè quò magis sanctitas & divinitas celesti hujus Sacramenti viro Christiano comperta est, eò diligentius cavere ille debet ne absque magnâ reverentiâ & sanctitate ad id percipiendum accedat &c.* De reliquo si ad illam perfectionem multi non pertingant, piè præsumit Ecclesia illos consecuturos illo spirituali & vivificante cibo justificationis gratiam; Eucharistiam enim quandoque per accidens conferre primam gratiam Antiquissima est Theologia alibi probanda.

Nec refert quod Concilium ibidem Sess. 13. cap. 7. dicat: *Ecclesiastica autem consuetudo declarat eam probationem necessariam, ut nullus sibi conscius mortalis peccati, QUANTUMVIS SIBI CONTRITUS videatur, absque præmissâ Sacramentali Confessione ad Sacram Eucharistiam accedere debeat modo non desit illis copia confessoris.*

Sess. 14.
cap. 4.

Non enim hoc dixit Concilium quasi iudicet , tunc quantumcunque perfectam Contritionem non iustificare ante Absolutionem , contrarium enim Sessione sequenti manifestè tradit ; sed quia Concilium bene scivit *aliquando* tantum, seu rarò, quempiam sic perfectè esse Contritum ut Deo sit per illam reconciliatus , priusquam Sacramentum hoc actu suscipiatur, ut cum majori reverentiâ & sanctitate accederent ad hoc cæleste Sacramentum, voluit ut securissimo modo se prius Deo reconcilient antequam divinum hoc Sacramentum audeant accipere. Deinde si semel permetteretur Sacerdotibus in mortale lapsis celebrare sine præviâ confessione quando sibi contriti videntur ; jam passim in mortali peccato celebrarent , cum quilibet , statim ac pium aliquem erga Deum affectum in se experiretur , iudicaret se esse Contritum , sicque in statu mortalis peccati celebraret imo multi putarent se esse debite Contritos qui tamen nullum supernaturalem doloris actum haberent, sed tantummodo naturalem ex amore proprio qui ubique subtiliter se ingerere conatur , vel ob infamiam quam per peccatum incurrerunt , vel ob damnum quod passi sunt , vel aliud motivum quod ipsos quandoque usque
ad

ad lachrymas movet. Unde ut ille abusus vitetur voluit Tridentina Synodus, ut quantumvis sibi Contriti videantur, peccatorum tamen Sacramentalem confessionem instituerent, ut sic certiores sint de dignâ sui dispositione; præsertim cum nullus possit habere nimiam, imo nec Sacramenti hujus reverentiæ congruam ac proportionatam dispositionem. Ob quas rationes ego judico jure divino naturali in illo casu ad Confessionem obligari Sacerdotem, cum ratio naturalis dictet peccatorem securissimo modo, moraliter hic & nunc possibili, se debere ponere in statu gratiæ antequam ad hoc divinissimum Sacramentum accedat ne se exponat periculo indignè tractandi hoc Sacramentum; imo id etiam fieri debere ab omnibus qui aliquod Sacramentum vivorum volunt suscipere maximè judico probabile.

Quantum ad mentem SS. Patrum fateor parum stricte hâc in re loquuntur idque variis de causis.

Primo ad inculcandam Sacramentorum novæ legis necessitatem, quæ, fateor, major est quam multi sibi persuaident.

Secundò quia judicarunt rarò peccatores pertingere ad Contritionem perfe-

etiam ex Charitate perfectâ procedentem, adeoque regulariter illos demum consequi peccatorum remissionem quando actu suscipiunt Sacramentum, non enim solet Deus simul infundere peccatori adhuc cæno peccatorum inhærenti perfectam Charitatem, sed primò imperfectam, quâ ipsum instigat ad condignam peccatorum pœnitentiam peragendam, quâ sensim & sensim eò magis incipit crescere Dei Charitas, quo plus decrescit mundi cupiditas. Quis autem nescit quam multa requisiverit primitiva Ecclesia ad congruam & crimini proportionatam pœnitentiam? Tam multa ut dicat S. Ambrosius: *Facilius inveni qui innocentiam servaverint, quam qui congruè egerint pœnitentiam.* Sine quâ pœnitentiâ nullus ad justificationis gratiam ordinariè pervenire potest, minor autem pœnitentia adhuc requiritur cum Sacramento quam sine Sacramento.

Tertio ad reprimendam quorundam negligentiam, qui ubi aliquales in Charitate progressus fecerant negligebant, & contemnebant Sacramenta; & consequenter ad excitandum majus desiderium & ferventius illa suscipiendi votum, & conciliandam majorem erga Sacramenta reverentiam.

Ob

lib. 2. de
Pœnit.
cap. 10.

Ob hanc ultimam causam dixit S. Aug. supra : *Quantumcumque Catechumenus proficiat, adhuc sarcinam iniquitatis suæ portat; non illi dimittitur, nisi cum venerit ad baptismum.* Quod enim ibidem S. Pater agat contra illos qui culpabiliter negligebant, adeoque & virtualiter contemnebant Baptismi Sacramentum, ex antecedentibus fit manifestum : parum enim antea petit : *Quare baptizabat* *Ibidem.* *Ioannes ? Quia oportebat ut Dominus baptizaretur. Quare oportebat ut Dominus baptizaretur ? Quia* MULTI CONTEMPTURI ERANT BAPTISMUM, eo quod jam majori gratia præditi viderentur, quam viderent alios fideles. Verbi gratia, conjugatus jam continenter vivens Catechumenus, contemneret conjugatum, & diceret se meliorem, cum ille sit fidelis. Ille Catechumenus potest dicere in corde suo, QUID MIHI OPUS EST BAPTISMUM ACCIPERE ut hoc habeam quod & iste quo jam melior sum ? Ad hoc autem viam præbuit. Dominus noster Iesus Christus, sicut audisti, fratres, ne quis arrogans quod habeat abundantiam alicujus gratiæ, dedignaretur baptizari baptismo Domini. Quantumcumque enim Catechumenus proficiat. &c.

Tract.
13. in
Evang.
Ioan.

Eodem modo & alia ejus loca explicanda sunt. Vide lib. 4. de Baptismo cap. 22.

Quantum ad rationem quam pro contrariâ sententiâ dare videntur SS. Patres,

D 5 quod

quod scilicet sine juncto utriusque concursu Contritionis & Sacramenti nullus justificari possit ; ad illam dicendum id regulariter esse verum , cum rarò Contritio perfecta , sine Sacramenti adminiculo justificans , habeatur ; secundo explicari potest de Sacramento in re vel in voto suscepto ; cumque haberi non possit votum baptismi quando præsens datur commoda baptismi copia , actualis illius perceptio planè tunc est necessaria , quod patebit ex §. sequenti.

Solutiones locorum SS. Patrum jam datæ non debent alicui contortæ videri , videmus enim quomodo aliquando & aliorum Sacramentorum necessitatem exaggerent ; quantum enim ad Augustinum quandoque docere videtur ita necessariam esse actuale Sacramenti Eucharistiæ perceptionem , ut quidam ei affingere conentur illum errorem quod & parvuli sine Eucharistiæ perceptione salvari nequeant. notus enim est Augustino aliisque Patribus nimium injurius , qui ait. *Sanè qui Augustini opiniones omnes tuendas susceperit , is ubi ad rem ventum erit , vadimonium deserat necesse est , uti in illâ de Eucharistiâ parvulis ad salutem necessariâ , quam aliorum trahere frustra magni viri conantur ; non enim inficiari jure quicquam poterit summum Doctorem ita sensisse. Non*
jam

jam vacat petulantis illud ingenii iudicium & injustam censuram refellere, & *summum Doctorem*, prout ipsum vocare coactus fuit, ab illo vindicare errore, verum illud jam olim fecit fidelissimus ejus discipulus S. Fulgentius libro de Baptismo Æthiopis.

Quod autem & S. Augustinus non ita planè omnimodè necessariam judicaverit, extra articulum mortis & martyrii casum, actuale Baptismatis susceptionem, liquet ex illis quæ habet in libris de Baptismo contra Donatistas, præsertim lib. 4. c. 21. ubi tradit Cornelium Centurionem ante perceptam baptismi fuisse justificatum, cum ait: *Iste enim & ante baptismum sancto Spiritu repletus est.* Et cap. 24. *Cornelius etiam dono Spiritus sancti priusquam baptizaretur ditatus est.*

S. X.

Proponitur sententia quæ docet quod quando adest copia Confessarii Contritio perfecta non justificet sine reali susceptione Sacramenti, & consequenter nec Charitas perfecta, & fertur de illâ judicium.

Ratio hujus sententiæ est quod Contritio perfecta in novâ lege tantum justi-

60 DISQUISITIO

Seff. 14.
cap. 4.

justificet ratione voti suscipiendi Sacramentum, uti colligi potest ex Tridentino dicente, *Esi Contritionem hanc aliquando Charitate perfectam esse contingat hominemque Deo reconciliare, priusquam Sacramentum hoc actu suscipiatur; ipsam nihilominus reconciliationem ipsi Contritioni, sine Sacramenti voto, quod in illâ includitur, non esse adscribendam.* Jam vero qui non suscipit Sacramentum, quando adest facultas illud suscipiendi, non habet serium propositum suscipiendi Sacramentum.

Confirmatur quia Tridentinum justificationem adscribit voto Sacramenti tanquam subsidario & operanti in defectu Sacramenti, quod subsidium non habet locum quando est in præsentī facultas suscipiendi Sacramentum propter copiam Confessarii, sicuti votum Baptismi non conferret gratiam justificationis, si adesset plena facultas suscipiendi Baptismum, & Catechumenus illâ facultate non uteretur.

Unde tenent istius sententiæ patroni tanquam generaliter verum, quod votum Sacramenti non operetur effectum Sacramenti, quando adest præsens facultas & commoditas suscipiendi Sacramentum & non suscipitur.

Verum & hæc sententia mihi non placet

cet neque sufficienter mihi fundata videtur cur enim non possum habere serium propositum & votum suscipiendi Sacramentum Poenitentiae etiam tunc quando adest copia Confessarii & adest facultas illud Sacramentum suscipiendi? possum enim habere efficax propositum & votum suscipiendi illud Sacramentum quando urgebit me praeceptum illud suscipiendi; sicuti possum habere votum & propositum serium ingrediendi religionem, ubi tamen jam datur facultas plena illam ingrediendi, sic tamen ut jam adhuc nolim ingredi, sed demum post aliquot dies vel menses.

Aliud foret si tunc, quando elicitur Contritio & ad est facultas suscipiendi Sacramentum, obligaret praeceptum suscipiendi hoc Sacramentum, tunc enim si nollem illud suscipere, rectè dicitur me non habere ejus votum & serium propositum, si enim hoc haberem indubiè susciperem illud quando commode possum & debeo illud suscipere. Deinde quando est obligatio illud suscipiendi & non suscipitur, mortaliter delinquitur, cum quo peccato vera Contritio perfecta consistere nequit.

Unde benè dicit Mellissius Doctor: *Sicut* Epist. 77.
nulla illi Poenitentia remittitur peccatum, si cum cap. 2.
possit, non restituit ablatum, sic & huic nulla pro- circa 6.
deris nem.

deris fides, si cum possit non percipit Sacramentum Baptismi, tunc enim indubiè illud suscipere obligatur. Quamquam & fidem convincitur non habere perfectam, si negligit. vera enim & plena fides universa praecepta complectitur. Est autem hoc unum ipsumque præcipuum ex praeceptis. Merito ergo non fidelis, sed planè rebellis atque contemptor reputabitur quisquis obedire renuerit. Quomodo denique fidelis, qui Dei contemnit Sacramentum?

Hinc patet quod generalis illa regula ab Authoribus contrariæ sententiæ allegata hoc modo debeat limitari: votum Sacramenti non operatur effectum Sacramenti quando adest præsens facultas & commoditas suscipiendi Sacramentum & urget præceptum illud suscipiendi, & non suscipitur. Ratio patet ex dictis, quia tunc à posteriori clarissimè evincitur non adesse efficax propositum & serium votum illud suscipiendi; sicuti omnes dicerent illum non habere efficax votum & serium propositum eundi Bruxellas, si jam commode possit & debeat ire Bruxellas, & non vult.

Deinde quod dicatur Contritionem perfectam in novâ lege tantum justificare ratione voti suscipiendi Sacramentum etiam sano modo intelligendum est; non enim dicit Concilium *quod soli Sacramenti*

voto reconciliatio sit adscribenda, sed tantum quod Contritioni non sit adscribenda sine Sacramenti voto, quæ verba Concilii in rigore vera forent, licet votum Sacramenti non foret justificationis causa; sicuti, licet dicamus Contritionem perfectam non justificare sine firmo proposito adimplendi omnia Dei præcepta, per hoc non insinuamus, propositum hoc esse justificationis causam, sed tantum conditionem sine qua non fit justificatio. Et indubie ipsa Contritio vi suâ habet efficaciam reconciliandi hominem Deo.

Secundo vel potest haberi Contritio ex Charitate perfecta illo tempore quo adest facultas suscipiendi Sacramentum Pœnitentie, & non suscipitur, vel non? Si dicas quod tunc Contritio perfecta haberi non possit, frustra instituitur questio an illa Contritio tunc justificet nec ne, cum Contritio tunc ex illo supposito haberi non possit: secundo ostendenda est repugnantia in eo quod illo tempore peccator eliceret perfectam Contritionem cum juxta dicta possit tunc habere votum efficax Sacramentum postea suscipiendi, & jam non obligetur actualiter illud suscipere. Si dicas quod possit tunc haberi, ergo juxta supra dicta mox justificabit antequam Sacramentum actu suscipiatur

ciatur, quia *alias Charitas perfecta*, quam includit illa Contritio, *Potest consistere cum reatu æternæ damnationis*. Quod tamen à Pio V. & Gregorio XIII. proscriptum est, si enim non justificaret sine reali susceptione Sacramenti, & jam habeatur antequam Sacramentum actu suscipiatur ergo existens in mortali peccato, quod nondum per Absolutionem remissum est, habet illam Contritionem, & retinet donec absolvatur, si habeat in mortali, ergo & cum reatu æternæ damnationis, quod mihi videtur nimium detrahare excellentiæ & efficaciam Contritionis ac Charitatis perfectæ, & non bene consistere cum illo S. Scripturæ oraculo, *Impietas impii non nocebit ei in quacumque Die conversus fuerit ad impietate sua*. Quia teste Scripturâ *universa delicta operis Charitas*.

Ezech.
cap. 33.
Proverb.
22.

§. XI.

Proponitur mens Authoris de sufficienti & requisito Dei propter se amore cum Sacramento.

Facilius quidem est in hac difficultate alienas sententias destruere ac refutare, quam propriam bene stabilire, ne tamen lectorem dubium & incertum relin-

linquamus circa mentem nostram illam paucis declaro.

Dico ergo mihi in primis certum videtur cum Sacramento requiri prædominantem Dei propter se amorem.

Probatur quia Deus exigit à pœnitentibus conversionem ex toto corde, uti ex adductis SS. Patrum locis patet; quis autem dicet illum se ex toto corde seu toto affectu convertere ad Deum qui prædominantem creaturæ amorem in corde suo non habet? quem indubiè habebit si in ipso non regnet seu prædominetur Dei amor, alteruter enim amor in corde hominis debet prædominari aut creatoris aut creaturæ juxta illud famosum S. Augustini Axioma: *Regnat carnalis cupiditas ubi non est Dei Charitas*. Enchir. cap. 117. vel ut loquitur S. Augustinus variis in locis, aut Charitas aut cupiditas, prout late ostendimus in prima parte nostri Tyrocinii tract. 1. cap. 4. §. 1. *Rationalis enim animus, qui sine dilectione esse non potest, aut Dei amator est aut mundi*, ait, S. Leo, prout vel Dei vel mundi in ipso prædominatur amor. Quod si cupiditas aut mundi amor in aliquo prædominetur indubie magis ad creaturam quam ad Deum conversus est, cum ad illud convertamur quod propter se amamus, quod si magis ad creatu-

Serm. 5.
de Iesu-
nio 7.
Mensis,

ram quam creatorem simus conversi, quomodo rectè dicemur ex toto corde ad Deum conversi? Illud tamen cum exigit vera cum Sacramento pœnitentia seu Attritio, manifestè sequitur nos ad minus, magis ad creatorem quam creaturam debere esse conversos, adeoque in nobis debere prædominari Dei amorem.

Secundò probatur ex hisce S. Scripturæ locis: *Qui amat Patrem aut matrem plusquam me, non est me dignus. Et qui amat filium aut filiam super me, non est me dignus.* Idem est de aliis creaturis. *Qui non renuntiat omnibus quæ possidet non potest meus esse discipulus, & similibus,* Ergo requiritur ut quis sit Deo dignus, & possit esse ejus discipulus, ut habeat prædominantem in se Dei amorem, sic ut de facto, quando se ad Deum convertit, non habeat majorem erga ullam creaturam, quam creatorem amorem. Si enim haberet majorem erga creaturam quam creatorem, de facto plus amaret creaturam quam creatorem adeoque Deo non est dignus, nec potest ejus esse discipulus, nec mirum cum manifestè impingat in

Math. 22. primum & maximum mandatum: *Diliges Dominum Deum tuum ex toto corde tuo, & in totâ animâ tuâ, & in totâ mente tuâ.* Item in illud: *Nolite diligere mundum, neque ea quæ in mundo sunt.* Adeoque si quis diligit mundum, non est

1. Joan. cap. 2. Ibidem. Charitas

Charitas Patris in eo. Nam & hoc solo mortaliter Deum offendit cum reverà magis æstimaret creaturam quam creatorem, quod cum verà pœnitentis ad Deum conversione consistere nequit.

Tertiò si illo tempore quo peccator se ad Deum convertit & jam absolvitur, prædominetur in homine adhuc amor creaturæ, quomodo exclusa est voluntas peccandi? Cum illa adhæsiō per amorem ad creaturam sit peccatum, nam teste S. Augustino *jubet lex aeterna avertere amorem à temporalibus, & illum convertere ad aeterna, & consequenter transgreditur illam legem* lib. 1. de libero arb. cap. 15. qui adhuc amore suo, & quidem prædominante, adhæret temporalibus, cujus legis æternæ transgressio indubiè est peccatum.

Quartò Patet ex omnibus illis SS. Patrum locis quæ exigunt ab homine ut semper in illo prædominetur Dei amor; si enim semper debeat habere illum prædominantem Dei amorem, ergo tum maximè quando jam Deum odio habuit, & se vult reconciliare Deo. Quod autem semper debeat habere illum prædominantem Dei amorem latius alibi demonstravimus, & liquet clarissimè ex illis quæ habet S. Franciscus Salesius lib. 10. de Amore Dei cap. 6. ubi ait: *Est amor qui om-*

nes amores debet excellere, & regnare super omnes nostras passionēs, & hoc est quod à nobis Deus requirit, ut inter omnes amores divinus præcipuum in corde locum obtineat, ut toti nimirum dominetur cordi; ut ille dilectissimus sit, totum videlicet animum possidens, ut latissimè regnet, omnes nimirum facultates sibi mancipans Hic amor omnibus & singulis hominibus generatim præcipitur, & hoc quam primum ad rationis usum pervenerunt, singulis sufficiens, omnibus necessarius. Vide S. Aug. lib. 1. de doctrinâ Christianâ cap. 22. verum illud latius alibi probabimus.

S. XII.

An ille prædominans Dei amor sit Dei super omnia & perfectus amor?

SIt ergo & hoc fixum requiri ad Attritionem sufficientem cum Sacramento ad justificationem Amorem Dei prædominantem; nunc gravis oritur difficultas qualis sit ille prædominans Dei amor & an talis non sit Dei super omnia ac perfectus amor? Ad quam difficultatem respondeo talem prædominantem Dei amorem non semper esse Dei perfectum amorem, hominem sine Sacramenti actuali adminiculo justificantem.

- Ratio est quia perfectus Dei amor non indiget

THEOLOGICA. 69

indiget ajuvari motivo pœnarum ad hoc ut voluntatem peccandi excludat, cum se solo omne malum ac graviter inordinatam creaturæ cupiditatem superet & excludat, & nullo modo cum ipsâ subsistere possi. At prædominans noster amor sæpissime duntaxat imperfectus est ac imbecillis, qui metus pœnarum indiget auxilio ad hoc ut voluntatem peccandi excludat, & abstrahat hominis affectum à creaturis, quibus per peccatum affixus erat, & ad Deum convertat.

Ut autem hoc melius percipiatur benè notandum est duos esse fontes ac radices actionum nostrarum nempe cupiditatem & Charitatem proat latius ex Communi SS. Patrum Consensu ostendi in nostro Tyrocinio loco §. præcedenti citato. Duo autem illi fontes & origines planè sunt oppositi, sic ut si regnet Charitas destruaturs ferè penitus cupiditas, & è contra; & quantum augetur Charitas, tantum decrescat cupiditas. Est hæc clarissima S. Augustini variis in locis doctrina, *Quanto magis, inquit, regnum cupiditatis destruitur, tanto magis regnum Charitatis auge-
tur. Et iterum; Charitatis venenum est cupiditas. Nutrimentum ejus diminutio cupiditatis.* Unde sicuti *regnat carnalis cupiditas ubi non est Dei Charitas, ita ubi non est cupiditas*

Enchir.
cap. 117.

regnat Dei Charitas , quâ regnante destruitur cupiditas , eò magis, quò plenius dominatur Dei Charitas , sic ut dicat S. Augustinus : *perfecta Charitas nec cupiditatem habet sæculi nec timorem*. At si amor Dei sit imperfectus seu imperfecta Charitas , & adsit in peccatore in mortali peccato constituto magna cupiditas , prout semper in tali peccatore adest , cum illa cupiditate expellatur Charitas antea dominans , tunc ille amor Dei imperfectus seu Charitas imperfecta nondum satis robusta est nec se solâ sufficiens ad vincendam illam magnam cupiditatem , adeoque indiget auxilio timoris gehennæ , quo illa cupiditas multum minuitur , sic ut post illum metum amplius solum maneat in ratione simplicis velleitatis quâ vellet adhærere inordinatè creaturæ si posset impunè , quæ parva restans cupiditas facile ab exiguâ superatur Charitate , quæ reverà tunc in homine prædominatur.

Unde ulterius dico illum Dei propter se imperfectum amorem esse tunc quidem amorem Dei super omnia cum , de facto post efficacem gehennæ timorem conceptum non habeat amplius efficacem cupiditatem seu absolutum creaturæ propter se amorem , sed tantum velleitatem jam dictam , quam expellit aliquousque
efficax

efficax & absolutus Dei propter seamor tunc dominans, sed hoc mere est per accidens, neque soli illi Dei imperfecto amori imputandum, cum priorem absolutam & efficacem cupiditatem, quâ peccator adhærebat creaturæ, non superasset, adeoque non fuisset prædominans, si timoris auxilium conjunctum sibi non habuisset, cui timoris adjutorio pro magnâ parte imputandum est, cum timor ille tantum diminuât de cupiditate ut jam superet illa Charitas, adeoque fiat prædominans, quæ sine illo non vicisset cupiditatem, adeoque sub dominante cupiditate adhuc gemere debuisset.

Valde ergo imbecillis, debilis, & imperfecta est illa Dei prædominans Charitas quæ fortiori mundi cupiditati succumberet, nisi gehennæ timorem sibi auxiliantem habetet conjunctum, qui cum Charitate superat hostem cupiditatis, quam se solâ Charitas vincere non potuisset, quod cum perfecta Charitas, quæ foras mittit timorem, facere posset, sequitur illam Charitatem, non esse perfectam Charitatem, nec celebrem Dei super omnia amorem, qui secundum SS. Augustinum & Prosperum: *Faciat Ierusalem seu civitatem caelestem usque ad consumptum sui*: & consequenter aliarum

creaturarum quas propter se ultimâte amat, quando illas in Deo & propter Deum non diligit.

Sit ergo & hoc fixum non omnem Dei propter se amorem prædominantem esse celebrem Dei super omnia amorem, vel Dei perfectum amorem, & consequenter non omnem Dei prædominantem amorem esse justificantem.

Ut autem & hoc melius intelligatur notanda sunt illa S. Augustini verba: *Numquid mox ut nascitur Charitas jam prorsus perfecta est? Vi perficiatur nascitur; cum fuerit nata nutritur; cum fuerit nutrita roboratur; cum fuerit roborata perficitur. Cum ad perfectionem venerit quid dicit: mihi vivere Christus est, & mori lucrum. Optabam dissolvi, & esse cum Christo &c.* Quis autem non videt illam prædominantem, de quâ mox egimus, Charitatem, non esse perfectam illam ab Augustino descriptam Charitatem, sed ad ad summum nutritam Charitatem? Nascitur enim Charitas, quando homini Deus infundit bonam voluntatem quâ incipit Deo affici; nutritur autem, quando eo usque crescit ut jam ex illâ operetur, & in tantum augeatur ut saltem simul cum timore vincat cupiditatem, sed tamen illo timore pœnarum adhuc velut pædagogo indiget & timore justitiæ; Roboratur autem, cum

Tract. 5.
in Epist.
Ioan.

cum jam subactâ cupiditate ita nutrita est ut ingruentibus tentationibus fortiter resistat; eoque robustior est quò graviorebus tentationibus resistit. Cùm hâc tamen Charitate remanent adhuc in homine varii affectus quibus adhuc affixus est, non ita tamen quin unio Charitatis cum Deo cum illis consistere ac perseverare possit, utpote cum Deo tanquam fini ultimo adhæreat; perficitur denique quando pro illo instanti quo elicit Charitatis actum planè liberum habet ab omni creaturâ affectum affixivum, sic ut ipsi vivere Christus sit & mori lucrum, & optet se esse liberum ab hoc mortali corpore, quod aggravat animam, ut sic tantò plenius & liberius soli Dei amorì insistere possit & liberatus esse ab impedimentis hujus mundi, quæ efficiunt ut sit impossibile etiam perfectis ac sanctis non quandoque volatilis affectu inordinatè creaturæ leviter inhærere. Nec mirum perfectam Charitatem hoc requirere, cum enim per illam Deus super omnia plane creata æstimeretur & ametur, etiam magis æstimatur ac amatur quam vita propria, & consequenter magis desiderat possidere bonum magis amatum & æstimatum, scilicet Deum, quam bonum minus amatum & æstimatum nempe propriam vitam.

Charitatem illam *natam, nutritam, robustam & perfectam* alibi vocat S. Augustinus *Charitatem inchoatam, provec̃tam, magnam & perfectam*, cum dicit : *Charitas inchoata, inchoata iustitia est ; Charitas provec̃ta, provec̃ta iustitia est ; Charitas magna, magna iustitia est, Charitas perfecta, perfecta iustitia est.*

De Nat.
& grat.
cap. 70.

Talem perfectam Charitatem habebant martyres qui cum omnibus amoribus, terroribus, erroribus suis vicerunt hunc mundum ut ait S. Aug. Talem perfectam Charitatem habebat Apostolus quando dicebat:

De Cor.
& grat.
cap. 12.

Rom. 8. *Quis nos separabit à Charitate Christi ? Tribulatio, an angustia, an fames, an nuditas, an periculum, an persecutio an gladius ? Certus sum enim quia neque mors, neque vita, neque angeli, neque principatus, neque virtutes, neque instantia, neque futura, neque sortitudo, neque altitudo, neque profundum, neque creatura alia poterit nos separare à Charitate Dei, quæ est in Christo Jesu Domino nostro. Talem Charitatem perfectam nondum habebat S. Petrus licet diceret : Etiam si oportuerit me mori tecum non te negabo. Et iterum. Animam meam pro te ponam Domine. Putabat enim se posse quod se velle sentiebat ait S. Augustinus. Nondum autem illum habuisse illam perfectam Charitatem exitus ipse comprobavit, qui sufficienter ostendit se nimium adhuc erga vitam propriam affectum*

Rom. cap.
13.

De grat.
& lib.
arb. cap.
17.

fectum habere, quam ne omitteret Christum negavit. Unde illius Charitatem dicit ibidem S. Augustinus fuisse *parvam* & adhuc *imperfectam*, dicit enim: *Qui vult facere Dei mandatum, & non potest, iam quidem habet voluntatem bonam, sed adhuc parvam & invalidam poterit autem cum magnam habuerit & robustam. Quando enim martyres magna illa mandata fecerunt, magnâ usque voluntate, hoc est magnâ Charitate fecerunt Ipsam Charitatem Apostolus Petrus nondum habuit quando timore Dominum ter negavit. Timor enim non est in Charitate, sicut ait Ioannes Euangelista in Epistolâ suâ, sed perfecta Charitas foras mittit timorem: & tamen, quamvis parva & imperfecta, non deerat, quando dicebat Domino: Animam meam pro te ponam.*

Illam supra descriptam perfectam Charitatem statâ & infallibili lege justificare omninò certum est, si in hac vitâ iustificet sine Sacramenti actuali adminiculo, cum perfectior nemini in hac vita unquam præterquam B. Virgini, quæ ab omni cupiditate extraordinaria Dei gratiâ libera fuit, concessa sit aut concedetur, & nonnisi in eminentibus sanctis reperitur; attamen an illa sola hominem extra Sacramentum iustificet quæstio moveri posset; magnam seu robustam Charitatem saltem in articulo mortis ex speciali

speciali Dei privilegio & bonitate justificare sine actuali Sacramenti adminiculo præclarorum virorum est doctrina, attamen nos & illam extra illum articulum justificare judicamus, cum Sanctus Augustinus in loco ultimò citato ex lib. de grat. & lib. arb. cap. 17. martyribus non nisi *magnam* seu *robustam* Charitatem attribuat, qui indubiè habuere Charitatem justificantem. 2. Ille affectus seu amor affixivus creaturæ, cui tamquam fini, non simpliciter ultimo, sed tantum secundum quid, in aliquâ nempe particulari serie actionum adhæret sicuti potest consistere cum Charitate perfectâ jam acquisitâ & non tollit unionem hominis cum Deo per Charitatem ita & consistere potest cum Charitate satis perfectâ reconciliante hominem cum Deo sine Sacramenti auxilio, cum satis fortis & robusta sit ad omnem cupiditatem graviter Deo displicentem, & consequenter ejus amicitiam impediendam, se solâ excludendam & repellendam; non enim omnimodè perfectissimam in hac vitâ possibilem Charitatem exigendam judicamus; cum sic non solum paucissimi, sed vix ulli justificationis gratiam sine Sacramenti adjutorio consequi possent. Deinde sicut volatici affectus ad creaturam possunt

sunt consistere cum perfectiori illâ Charitate & non impediunt quo minus hominem mox antequam actu Sacramentum suscipiatur justificet, cur impediunt illum effectum affectus quidam affixivi, cum ambo non tollant vel impediunt unionem vel vinculum Charitatis hominis cum Deo, vel amicitiam hominis cum Deo? Unde licet magna illa seu robusta Caritas, non dicatur à S. Augustino perfecta Caritas, respectu ad illam perfectiorem descriptam, est tamen simpliciter in se perfecta satis ad justificationem nihil enim obest cur in perfectâ Charitate justificante non possint dari perfectionis gradus & una alterâ esse perfectior, sicuti de facto perfectissimâ omnium Sanctorum Charitate adhuc perfectior habuit B. Virgo: Et non est dubium quin is, qui per justificantem Charitatem se è statu peccati transtulit ad statum gratiæ, possit in illâ Charitate crescere, illamque sic magis ac magis perficere, cum Charitati nullus sit in hac vita finis & terminus positus, modus enim diligendi Deum est diligere sine modo juxta mellifluum ac non nisi spirantem Charitatem S. Bernardum, infinita enim bonitas infinitam à sua creatura mereretur Charitatem, si hæc possibilis foret.

At

At gravissima jam exurgit difficultas quid requirant SS. Patres ad perfectam Charitatem justificantem, de quâ sit sequens paragraphus.

§. XIII.

Quandonam Charitas sufficienter sit perfecta ad hoc ut sine actuali Sacramenti adminiculo hominem Deo reconciliare possit?

R Esp. Teste Bellarmino subinde dicitur Charitas perfecta quoniam non modo Deum super omnia diligit unico actu voluntatis, dum eum cogitat summum esse atque infinitum, sed etiam perseverat in dilectione usque ad implementationem omnium mandatorum, quæ dicitur dilectio super omnia quoad affectum & effectum. Imperfecta verò quandò afficitur quidem in Deum super omnia, dum eum cogitat summum esse bonum, & nulla occurrit tentationis occasio, tamen occurrente objecto aliquo alliciente facilè deficit & extinguitur. Verum hæc perfectæ ac imperfectæ Charitatis idea non sufficit intento nostro: licet enim à posteriori bene colligamus illam esse Charitatem

ritatem perfectam quæ perseverat in dilectione usque ad impletionem omnium mandatorum, & nullis tentationibus evertitur; & è contra illam tantum esse imperfectam quæ occurrente tentatione facile deficit & extinguitur, adeoque cupiditati facile succumbit, tamen contingere potest perfectam Charitatem, quæ etiam sine reali Sacramenti susceptione justificat, non perseverare aliquo tempore in Dei dilectione, sed ingruente gravissimâ tentatione succumbere, sicuti enim maximi Sancti robustissimâ præditi Charitate graviter nonnunquam delinquant & sic à Charitate excidunt, quid ni fieri potest ut is, qui è statu peccati per Charitatem justificantem se extraxit, in simile vel aliud peccatum iterum mox occurrente tentatione, labatur sicque Charitas, quæ sufficiens erat ad implenda Dei mandata, non perseveret sed iterum deperdatur? Non ergo ad Charitatem perfectam justificantem requiritur ut perseveret in dilectione Dei usque ad omnium mandatorum impletionem. Sed ad minus tum sufficit si sit talis Charitas quæ sufficiens est ad omnium mandatorum Dei impletionem quæ de facto excludit penitus omnem affectum graviter inordinatum ad creaturam, totumque affectum

ctum in Deum transfert, tamque firmo nexu Deo affigit, ut si illo tempore quo elicitur & actu perseverat animum pulsarent omnia hujus mundi delectamenta ut hominem ad mortale peccatum allicerent; simulque omnia Tyrannorum tormenta proponerentur ad abstrahendum hominem à Dei dilectione, illis tamen non succumberet sed Deo per dilectionem maneret adhærens; Nonne hæc satis magna robusta & perfecta est Charitas? O quam pauci ad illam pertingunt.

Omissis aliorum sententiis quas referre & refutare nimis longum foret breviter nostram declarabimus

Illam ergo nos satis perfectam ad justificationem judicamus Charitatem quæ excludit omnem servilem timorem sic ut homini displiceat peccatum nullomodo propter poenam; sed nudè quia divinæ displicet bonitati cui unice adhærere firmiter desiderat & vult ipsi in æternum servire, illumque glorificare & amare, sitque illa tam fortis ut se solâ sine motivi alterius adjutorio omnem affectum graviter inordinatum ad creaturam superare possit & expellere.

Liquet primo ex S. Scriptura quæ ait:

1. Joan. 4. Perfecta Charitas foras mittit timorem.

2. Ex Gilleberto Ordinis Cisterciensis

Ab-

Abbate viro Spiritu, ac doctrinâ S. Bernardi pleno qui complevit aureum illud opus S. Bernardi in Cantica; hic ergo Author ait: *Dedignatur Charitas TIMORIS COMMERCIIUM, cogi nesciens, quæ nequit compesci. Ideo Charitas perfecta foras mittit timorem, velut inutilem & supervacuum sed non timorem illum qui castus permanet in seculum seculi Iniuria quadam iustitiæ est si metu penarum in gratiam veniat. Satis ipsa per se meriti obinet ut hominum in se studia provocet, & conciliet affectus. HUNC ERGO TIMOREM CHARITAS PERFECTA EXCLUDIT. QUOMODO ENIM PERFECTA CHARITAS, QUÆ TIMORIS STIMULO INDIGET AD CULTUM IUSTITIÆ? Perfecta dilectio mentem in solido possidet, omnia soli sibi iustitiæ munera deputari volens. Frigidus timor est, & pigre incedit, satis habens tantum impune evadere. Amor fastidium nescit, fervidus est, & in anteriora extensus. Metus contractior necessitate tantum iustitiæ subit officia. Amor perfectus soli, quod agit, debet iustitiæ, nihil in eâ juris relinquens timori Si non ejus (Christi) obtentu solius obtemperatur ipsi, quomodo erit ejus perfecta dilectio? Trahe me Deus in te ipsum, ut nullo indigeam timoris impulsu, sed perfecta Charitas usum ejus excludat. Quid igitur non sunt metuenda æterna supplicia? Metuenda planè sunt & cavenda, nemo enim unquam carnem suam odio habuit, sed vehementior Christi dilectio motu timoris non eget in affectum*

F iustitiæ.

Serm. 196
in Cantica ha-
betur inter opera
S. Bernardi tom.
5.

justitiæ. Amor iste nihil tam veretur quantum offensam, sed propter offensam & non propter penam. Idem docet Author libri de modo bene vivendi ad Sororem qui habetur inter opera S. Bernardi. Ubi ait: Qui adhuc timet (agit de timore servili) non habet perfectam fiduciam in die judicii. Nondum est in illo perfecta Charitas qui adhuc timet, quia si perfecta in illo esset Charitas non timeret. Perfecta Charitas faceret in homine perfectam justitiam, & homo non haberet unde timeret, sed haberet unde desideraret ut transeat iniquitas & veniat regnum Dei. Quid est perfecta Charitas nisi perfecta sanctitas? Hisce accedat autoritas D. Augustini supra dicentis: Ipsam Charitatem (perfectam) Apostolus Petrus nondum habuit quando timore Dominum ter negavit: Timor enim non est in Charitate, sed perfecta Charitas foras mittit timorem.

De grat.
& lib.
arb. cap.
17.

Hæc est illa perfecta Charitas de qua I. Ioan. 4. Joannes dicit: In hoc perfecta est Charitas Dei nobiscum, ut fiduciam habeamus in die judicii. Quomodo enim non haberet fiduciam in die judicii quæ illa quæ agit ex Charitate propter Deum operatur? Nemo se amari diffidat qui jam amat: libenter Dei amor nostrum, quem prævenit subsequitur. Nam quomodo redamare pigebit quos amavit & necdum amantes? Amavit inquam, amavit. Ait S. Bernardus Non timeat anima quæ amat, paveat quæ non amat:

Epist.
107.

amat : ait S. August. in Manuali cap. 20.

Hæc est illa perfecta Charitas de qua Ioannes Climacus ait : *Charitas denique perfecta est cuiusque adversa pravaque intentionis cogitationisque depositio. Charitas enim non cogitat malum. Charitas & tranquillitas & filiorum adeptio solis nominibus distincta sunt.* Nonne enim deponit pravam cogitationem & perversam intentionem qui superando peccatum illud vitat ex solo motivo quod illud displiceat divinæ bonitati, cui soli unicè placere desiderat?

Gradu
30. de
vinculo
fidei &
Charit.

Hæc est denique illa perfecta Charitas, quæ teste Apostolo, *non querit quæ sua sunt.* Cum homo in illa detestatione non quærat suum proprium commodum, sed solam Dei Gloriam & honorem, quam peccando inhonorarat.

Hæc Charitas indubiè est Dei super omnia amor cum se solâ superet ac excedat omnem erga creatura affectum.

Charitatem ergo perfectam justificantem extra Sacramentum hoc modo describere possumus: est Dei propter se amor qui se solo sufficiens est ad excludendum omnem affectum quo homo inordinatè inhæret creaturæ tanquam fini ultimo, illumque ad Deum convertendum.

Charitatem vero imperfectam, quæ se solâ id prestare nequit, sed ad hoc in-

diget timoris gehennæ auxilio.

Hæc ergo est reverà parva & imbecillis ; illa robusta , magna & fortis. Sub illâ homo respicit adhuc ad semetipsum , propriumque suum commodum ; cum hâc solum Dei bonum & commodum. Sub illâ partim respicit peccatum ut est offensa Dei quem incipit diligere partim ut est meritorium pœnæ quam sibi timet ; Cum hâc nudè respicit peccatum ut est offensa Dei , cui unicè jam placere desiderat. Sub illâ partim adhuc est servus , in quantum timet pœnam ob quam detestatur peccatum , partim incipit esse filius in quantum detestatur peccatum ut est offensa Dei ; cum hâc solo filiali affectu procedit cum filiorum proprium sit detestari peccata in quantum Patri displicent ; unde per hanc statum adoptionis filiorum consequitur.



§. XIV.

*Proponitur & discutitur difficultas,
Cur non omnis Dei amor prædomi-
nans licet imperfectus justificet an-
tequam Sacramentum actu suscipia-
tur, cum per illum homo se aver-
tat à creaturis graviter inordinatè
amatis, & convertat ad creatorem,
conversio autem peccatoris per amo-
rem ad Deum tollat peccatum.*

R Esp. Aversio affectus inordinati à
creaturis & conversio ad Deum tol-
lunt quidem peccatum quoad affectum
seu complacentiam peccati, cum illis
positis peccatori pœnitenti reverà displiceat
peccatum, illudque detestetur ac
fugere conetur, sed tamen non tollunt
peccatum quoad reatum seu dignitatem
inimicitiae divinæ; non enim satis est ad
placandum Deum offensum, ut hominì
displiceat peccatum, illudque detestetur
& relinquat, seque iterum ad Deum, à
quo per peccatum se averterat, conver-
tat, sed præterea requiritur aliquid quod
suo modo mereatur favorem & amici-
tiam divinam, & illud est Charitas per-
fecta

fecta etiam sine Sacramento, vel imperfecta cum Sacramento, cui specialiter in Sacramento conjungitur virtus Passionis Christi Domini, cujus respectu favorem divinum amicitiae Dei meretur. Hinc provenit quod Deus non qualemcumque à peccatore exigat ad se conversionem, sed *conversionem ex toto corde, ex toto affectu, in jejuniis, fletu, planctu &c.* ut illa divinam justitiam ad misericordiam flectat sicque divinam amicitiam mereatur.

Responsio hæc satis clarè in rebus humanis patet, qui enim alteri injuriam fecit, illumque offendit, non satisfacit justitiæ, nec delet offensam ex eo quod ipsi jam displiceat illa, illamque retractet, sed indubiè plura ab offenso amico exiguntur.

Unde licet infallibiliter ad exclusionem voluntatis peccandi, & ad peccati remissionem exigatur averfio affectus à creaturis, quibus tamquam fini ultimo adhærebat, & conversio ad Deum, juxta illud S. Augustini: *conversis ad se donat peccata, non conversis non donat.* & illud S. Bernardi: *Vera nobis vita non nisi in conversione est, nec aliter ad eam patet ingressus Nec immerito sanè à filiis quidem hominum videtur exigenda conversio ad Dominum Deum, peccatoribus utique necessaria, uti ex pluribus supra citatis*
S. Scri-

In Psalm.
32.

cap. 1.
de Conversione
ad Clericos.

S. Scripturæ locis quæ exigunt conversionem peccatoris ad Deum, & consequenter averfionem à creaturis, liquet; tamen illa conversio ex perfectâ supra dictâ Charitate procedat necesse est ut sine Sacramenti adminiculo iustificet.

Ex hac doctrinâ notabilem hanc deduco conclusionem, Quod licet *Attritio aliqua excludat voluntatem peccandi, inde tamen non sequatur illam sufficere ad justificationem etiam cum Sacramento*; quia ratio naturalis dicat quod non sufficiat ad remissionem offensæ quod non velimus alterum offendere, sed quid amplius requiratur ut ex dictis constet. Unde Alexander VII. in suo decreto expressè prohibuit censurare sententiam quæ docet. *Attritionem ex metu gehennæ excludentem voluntatem peccandi cum spe veniæ non sufficere ad impetrandam gratiam in Sacramento penitentia, sed insuper aliquem actum dilectionis Dei requiri.*

Ex quo evincitur quod licet adversarii probarent Contra SS. Patrum unanimem sententiam Attritionem ex solo gehennæ metu penitus posse excludere voluntatem peccandi, imo & illam hominem ad Deum posse convertere, quæ tamen in doctrinâ Patrum nusquam reperies: inde tamen nondum evincerent illam Attritionem sufficere cum Sacramento ad justifi-

cationem. Quid enim in illa Attritione reperire est quod aliquo modo mereatur favorem amicitiae divinae; cum in illa non detestetur peccatum quia Deo displicet, id enim actus amoris est, aut propter Deum, sed ex amore propriae pellis cui timet? Quomodo enim actus aliquis potest apud aliquem aliquid mereri, quando non fit in gratiam alterius aut ex ejus intuitu?

Huc accedit quod qui peccatum commisit, saltem interpretative voluerit offensam Dei; hæc autem interpretativa voluntas ante in hunc modum contracta in æternum non retractabitur, nisi postea displiceat offensa Dei, & in æternum hæc non displicebit quam diu peccator solum procedit ex timore gehennæ.

Hinc non nulli docent, (quod tamen non assero) non incurrere excommunicationem Alexandri VII. latam in citato decreto qui dicit hanc sententiam: *Attritio ex solo & puro puro gehennæ metu sufficit ad justificationem in Sacramento*: Esse falsam, periculosam, & fidei contrariam aut aliâ notâ dignam. Quia de illa Attritione non agit Alexander VII. in suo decreto: nam tantum vetat censurari sententiam nostram, uti & illam quæ dicit, *Attritionem ex metu gehennæ excludentem voluntatem peccandi sufficere ad justificationem cum Sacramento*. Attritio-

tritionem autem ex solo gehennæ metu voluntatem peccandi (ad mentem Concilii Tridentini) excludere omnino negant.

§. XV.

Vndenam oriatur unam Charitatem seu Dei propter se amorem prædominantem esse parvum, debilem, imbecillem ac invalidam & indigere motivo penarum ad excludendum omnem affectum ad creaturam graviter inordinatum; alterum vero robustam, magnum, & fortem, ac se solo omnem illum affectum excludentem.

QUæstio hæc indubiè valde difficulter decidi potest cum, ut alibi monuimus & ostendimus, nobis planè incognita sit actuum voluntatis & qualitatum, maximè supernaturalium, qualis est Charitas, natura ac modus operandi; ut tamen nostram illâ de re ideam exprimamus, prænotandum nos hic non agere de Charitate habituali, quæ pro majori dispositione pœnitentis à Deo major infunditur, quæ & magis ac magis accrescit pro ut plura & excellentiora opera

meritoria homo exercet , unde & in D. Virgine inter omnes puras creaturas maxima est & fuit habitualis Charitas.

Agimus ergò de Charitate seu Amore Dei propter se actuali , quo peccator se ad Deum convertit , & putamus Amorem Dei perfectum & imperfectum solummodo distingui penes intensum & remissum , quod Amor Dei prædominans imperfectus sit minus intensus seu magis remissus quam Amor Dei prædominans perfectus.

Probatur I. hæc sententia quia cæteris paribus secundum omnes qualitatum perfectio & imperfectio desumitur ex majori vel minori earum intensione , atqui, saltem in Peripateticorum scholâ, Charitas actualis est qualitas, ergo ejus perfectio vel imperfectio est desumenda ex majori vel minori ejus intensione. Abstrahimus hic ab illâ Philosophicâ & Theologo indignâ quæstione , nobis incertissimâ , an qualitates verè in se intenduntur & quomodo intenduntur ; & actus voluntatis sint veræ qualitates à voluntate realiter distinctæ , certum enim est illa quæ communiter vulgo appellant qualitates , certo modo intendi & remitti , prout in calore experientia comprobatur.

Prob.

Prob. 2. Quia in communi sententia eò perfectior est habitualis Charitas, quò est intensior; ergò etiam eò perfectior est actualis Charitas vel dilectio quò est intensior.

Prob. 3. Quia communiter apprehendimus nos eò perfectius aliquem diligere quo majori voluntatis conatu benevolentiae eum prosequimur? At quid ille major voluntatis conatus quam major intensio? Hinc homines sæpe conqueruntur de amicorum remissâ dilectione, & instigant ut conentur illos intensiore Amore prosequi.

Prob. 4. Sicuti naturalis calor eò est perfectior quò intensior; & quò intensior eò fortior, efficacior ac major; ita etiam calor ignis illius supernaturalis, de quo veritas dicit: *Ignem veni mittere in terram*, Luc. 12. & *quid volo nisi ut accendatur?* Eò perfectior quò intensior, eoque fortior, efficacior, ac major; & sicut remissus calor est parvus, invalidus & imbecillis, ita etiam remissa Charitas est parva invalida & imbecillis, quæ sensim majus incrementum accipiendo fit perfecta.

Prob. 5. Quia Ecclesia orando: *Danobis fidei spei & Charitatis augmentum*, non solum orat pro Charitatis habitualis augmento, sed & pro majori Charitatis actualis

lis augmento ; at per quid augetur actualis Charitas , quam per majorem Charitatis intensiorem ? Et quid est orare pro majori actualis Amoris augmento , quam orare ut Amor imperfectus magis intendatur ac sic tandem fiat perfectus ? Hinc etiam S. Augustinus supra dicit Charitatem primùm *nasci* , postea *nutriri* , tum demum *roborari ac perfici*. Sicut autem corpus nutritur per hoc quod novæ partes alimenti agglutinentur ac convertantur in substantiam aliti , ita & Charitas nutritur per hoc quod novæ quasi partes ac gradus (quidquid illi gradus sint) Charitati adjungantur ; non enim cogitare debemus actualem Charitatem tamquam qualitatem & rem fluentem ac transitoriam mox evanescere , *persistat* , inquit S. Augustinus , *bona voluntas adversus concupiscentias malas*. Imo SS. Patres cum loquuntur de Charitate ejusque augmento , perseverantiâ , &c. semper ferè loquuntur de Charitate actuali , quia rarissime loquuntur de Charitate habituali quando agunt de adultis ; adeo ut nuper quidam Author in Quæstione Theologicâ de Gratiâ Justificante putet quod SS. Patres in adultis nusquam videantur agnovisse habituales Charitatem distinctam ab actuali & virtuali , bene tamen in parvulis , sed hoc est alterius indaginis.

Sen-

Sententiam hanc confirmant hæc sequentia divini Verbi Oracula : *Oro ut Charitas vestra magis ac magis abundet. In Charitate crescimus.* Item illud S. Gregorii : *Vnaquaque virtus quasi quibusdam gradibus agitur, & sic per incrementa meritum ad summa perducitur : alia namque sunt virtutis exordia, aliud perfectus, aliud perfectio.* Et denique illud Sapientis : *Iustorum semita quasi lux splendens procedit & crescit usque ad perfectum diem.* Sicut enim aurora per solam majorem luminis solis intensiorem crescit, dispellit nubes & fit perfectus dies, ita & prima scintilla Charitatis, quæ est quasi aurora, per majorem Charitatis intentionem crescit, dispellit nubes cupiditatum, & pervenit ad perfectum diem Charitatis in quo depulsis tenebris peccatorum splendet & luget sol justitiæ supra horizontem animæ illamque totaliter radiis suæ Charitatis accendit. Pulchrè de hoc discutrit S. Salesius in lib. de Amore Dei, ubi ait : *Deus bone, Theotime, quantæ consolationis est considerare sacram hanc Methodum, quæ Spiritus S. primos sui luminis & caloris vitalis radios sensusque immittit in corda nostra ! O Iesu dulcissime quantis deliciis abundans est gaudium videre caelestem Amorem (qui sol est & decus virtutum) dum per admirandos quosdam progressus (qui sensim & quasi sine sensu efficiuntur sensibiles) explicans suam claritatem,*

Philipp. 1.
Ephes. 4.

Hom. 15.
in Ezech.

Proverb.

lib. 2.
cap. 13.

ratem, eam facit splendescere in animis mortalium, nec unquam cessat eos magis ac magis illuminare, donec tandem illos penitus cooperiat, & velut obruat luce suæ præsentia, illisque elargiens perfectissimum splendorem serenissimæ diei. O quam hilares, quam pulchra, quam amabilis, quamque grata est isthæc aurora! Verumtamen stat, quod aurora illa aut non sit dies, aut si dies est, sit enim tantum inchoans, & oriens, vel potius insans diei, quam ipsemet dies. Eodem pene modo motus Amoris, qui præcedunt actum fidei requisitum ad nostram justificationem, vel non sunt Amor ipse, propriè loquendo, vel certè sunt incipiens & imperfectus.

Ultimò, hæc sententia ex eo etiam confirmatur quod ex nullo alio capite deduci possit illa differentia Charitatis perfectæ & imperfectæ; non ex parte potentiæ, cum utrumque actum Charitatis perfectæ & imperfectæ eadem voluntas adjuncta supernaturali Dei gratiâ eliciat. Non ex parte motivi, cum utraque respiciat Dei bonitatem vel aliam Dei perfectionem. Non ex parte modi tendendi, cum utraque tendat in Deum, seu aliquam ejus perfectionem propter se ibi hærendo. Ergò à sufficienti divisione debet peti ex majori vel minori Charitatis intensione.

§. XVI.

Quanam Charitatis intensio requiratur ad hoc ut Charitas sit perfecta & quanam ad hoc ut cum Sacramenti actuali auxilio tantum justificet.

Questio hæc indubiè maximæ est difficultatis & nonnisi difficulter decidi potest, attamen rei obscuræ, quantum poterimus, lucem adferemus.

Suppono ergo quoad primum non requiri ad Charitatem perfectam justificantem sine Sacramenti actuali adjutorio ut sit intensissima, illa enim dari non potest, saltem numquam in hac vitâ data fuit nequidem D. Virgini, imo ne quidem Christo Domino, nam teste S. Salesio dicente: *Ne ipsamet quidem Charitas, quæ est in nostro Redemptore, quia est homo, quamvis sit major, quam & homines & Angeli possint comprehendere, tamen in suo esse, seu ex seipsâ non est infinita, sed solummodo in estimatione suæ dignitatis & meriti, quia scilicet est Charitas personæ infinitè excellentis, id est personæ divinæ, quæ est æternus omnipotens Patris filius. Si non sit in seipsâ infinita, ergo adhuc magis intendi potest. Undè multi tenent intensissimam Charitatem esse planè impossibilem, & reverâ si possi-*

lib. 3. de
Amore
Dei c. 1.

possibilis foret, Christo Domino negari non posset.

Qualis autem præcisè intentio requiratur, hoc soli Deo cognitum est; Unde obligatur homo summum adhibere conatum quem moraliter adhibere potest, ad illam Charitatem elicendam, quando actum illum Charitatis perfectæ elicere conatur. Nec hoc mirum cum etiam Authores contrariæ sententiæ fateri cogantur se ignorare quænam præcisè requirantur ad Charitatem perfectam & quandonam illam eliciant, si enim hoc scirent, possent esse certi de suâ justificatione, & sic non esset verum illud Scripturæ: *Nescit homo an amore an odio dignus sit.* Adeoque homo cum timore & tremore salutem suam operari debet.

Quantum ad Charitatem imperfectam justificantem cum Sacramento, qualis ad illam requiratur intentio etiam non potest determinari, sed debet attendi tum ad timorem cum illa Charitate concurrentem, tum ad cupiditatem in peccatore residentem; quod enim minor est timor & major est cupiditas, eò major ac intensior debet esse Dei Charitas: si enim sit efficax timor propemodum totam expellet peccandi voluntatem seu cupiditatem, sic ut tantummodo relinquet simplicem velleitatem,

THEOLOGICA. 97

tatem, qua vellet peccare si posset impunè, cui cupiditati remanenti facilè parvus ac remissus Dei Amor prædominari potest: si autem sit parvus timor & magna cupiditas, tunc timor non multum de illâ diminuet, adeoque tunc eò fortior ac intensior debet esse Charitas, ut illi cupiditati possit prædominari, illamque expellere.

Unde fit consequens ad Attritionem requisitam cum Sacramento non requiri stabilem aliquam ac determinatam Charitatis seu dilectionis intensiorem, sed nunc majorem nunc minorem pro variâ dispositione Pœnitentis. Adeoque contingere potest quod dilectio sufficiens in uno, possit esse insufficiens in altero ad justificationem. Sicuti enim SS. Patres unanimiter docent eò majorem debere esse Pœnitentiam, quo gravioribus ac pluribus Pœnitens constrictus est vitiis seu peccatis, nam *fortius est dolendum, quia fortius est* cap. 8.

peccatum, ut ait S. Ambros. ad Virginem lapsam. *Quam magna deliquimus, tam granditer defleamus, Pœnitentia crimine minor non sit.* Ait S. Cyprianus. Cujus ratio à priori est quia secundum constantem SS. Patrum doctrinam *Pœnitentia debet crimini esse proportionata*, seu, ut loquitur S. Augustinus, agenda est Pœnitentia *secundum modum sui* Enchirid. cap. 65.

G

cujusque

cuiusque peccati. Liqueat hoc ex S. Ambrosio lib. 1. de Poenit. cap. 2. Basilio Hom. in hæc verba: Attende tibi ipsi. Ex Epist. Cleri Romani ad Cyprianum. Isidoro Hispalensi lib. 1. Sent. cap. 13. & dicat hoc clarè ipsa naturalis ratio. Ergo quo graviora & plura commissa sunt peccata, eò major est adhibenda poenitentia. Ita etiam nos conformiter dicere possumus, eò majori hominem ad Deum debere redire Amore, quo majori odio Deum averſatus est, si enim dolor eò major debeat esse quò gravius fuit peccatum, ergo etiam eò major debet esse Amor; parum enim Deus respicit dolorem de commisso peccato, si is ex vero sui affectu non proveniat, & pro tanto placet dolor, pro quanto ex sincero Dei Amore provenit.

Imo etiam contingere potest Charitatem imperfectam sufficere cum Sacramento in uno ad justificationem, qui est insufficiens in altero, licet uterque iisdem planè peccatis subjaceat, si nempe in uno sit major gehennæ timor quam in altero, tunc enim fieri potest ut imperfecta Charitas cum auxilio majoris timoris excludat voluntatem peccandi; & fiat prædominans, quod tamen eadem cum minori timore facere nequit. Illud etiam in uno eodemque homine pro diverso tempore,

&

THEOLOGICA. 99

& varietate dispositionum fieri posse certum est. Eodem ergo modo hic loquendum de hac Charitate, sicuti docet Augustini sententia de Gratiâ; eadem enim gratia potest esse planè efficax in uno, omnemque in illo superare resistantiam, totumque suum operari effectum, seu absolutum velle & perficere, in altero verò inefficax, sic ut tantum producat in illo simplicem velleitatem, qui nempe induratum in malo animum habet.

Hinc provenit, quod, quando in homine æque ferè intensa est erga Deum Charitas & cupiditas, sic tamen ut cupiditas adhuc prædominetur, oriatur illa lucta, quam in seipso expertus est S. Augustinus, quamque describit in suis Confessionum libris, dicens: *Voluntas autem nova quæ mihi esse ceperat ut te gratis colerem, fruique te vellem, Deus sola certa iucunditas, nondum erat idonea ad superandam priorem vestiglate roboratam. Ita duæ voluntates meæ, una vetus (cupiditas) alia nova: (Charitas) illa carnalis, illa spiritalis, confligebant inter se, atque discordando dissipabant animam meam* Ita sarcinâ sæculi, velut somno assoleo, dulciter premebar, & cogitationes, quibus meditabar in te, similes erant conatibus expergisci volentium, qui tamen superati soporis altitudine remerguntur Certum habebam esse melius tuæ Charitati me de-

lib. 8.
cap. 5.

dere, quam mea cupiditati. cedere. Sed illud placebat & vincebat, hoc libebat & vincebat

Et inde illa verba lenta & somnolenta; Modo, ecce modo, sine paululum, Sed modo & modo non habebant modum: & sine paululum in longum ibat. Frustrà condelectabar legi tuæ secundum interiorem hominem cum lex alia in membris meis repugnaret legi mentis meæ, & captivum me duceret in legem peccati, quia in membris meis erat. At ubi nova voluntas Charitatis tunc adhuc parva, invalida & imbecillis, postea robustior, intensior ac fortior facta est vetere voluntate cupiditatis, tunc vel totaliter vel pro magnâ parte cessavit lucta, & ita cupiditas superata fuit ut dicat: Quam suave mihi subito factum est carere suavitatibus nugarum? Et quas amittere metus fuerat, jam dimittere gaudium erat. Ejiciebas enim eas à me, vera tu & summa suavis: ejiciebas & intrabas pro eis omni voluptate dulcior, sed non carni & sanguini; omni luce clarior, sed omni secreto interior.

lib. 9.
Conf.
cap. 1.

Nec est quod quis urgeat hanc sententiam præbere materiam multis scrupulis, cum quilibet semper possit dubitare, num habeat præexistente cupiditate majorem, fortiolem ac intensiorem Charitatem seu Dei propter se amorem; nam etiam in adversariorum sententia ad minus requiritur cum Sacramento ad justificationem

ficationem attritiō, quæ sit supernaturalis, cum pateat ex variis Conciliis & Patribus dolorem de peccato commisso debere esse ex gratiâ; unde Concilia frequenter docent neminem posse pœnitere sicut oportet sine dono gratiæ divinæ, sic expressè definit Tridentinum: *Si quis dixerit sine præveniente Spiritus Sancti inspiratione, atque ejus adjutorio, hominem credere, sperare, diligere, aut pœnitere posse sicut oportet ut ei justificationis gratia conferatur Anathema sit.* Vide Concilium Arausicanum II. cap. 6. 7. 8. 9. & 25. Ut proinde meritò dicatur hæreticum, quod Attritio naturalis sufficiat cum Sacramento ad justificationem. At quis multò minus potest cognoscere an habeat supernaturalem Attritionem, quam an habeat majorem ac intensiorem Charitatem, cum ex variis effectibus (quos assignavi in prima parte Tyrocinii nostri tract. 2. cap. 4. §. 1. num. 71. secundæ editionis) ille prædominans Dei Amor colligi possit, & consequenter ejus supernaturalitas, cum Amor Dei propter se, quantumvis imperfectus, semper sit supernaturalis; non ita autem supernaturalitas Attritionis ex gehennæ metu, cum talis Attritio facile viribus naturæ haberi possit, uti probavi in citato Tyrocinio tract. 1. cap. 4. §. 2. num. 77. Ergo sic

Seff. 6.
Can. 3.

Vid. 77.
1. 2.
uti §. 9.

uti adversariorum sententia non præbet materiam scrupulis, ita nec nostra.

Ut tamen quantum possibile est securos homines reddamus dicimus confidenter cum S. Augustino, quod, qui in voluntate suâ veram erga Dominum Deum inveniunt synceram Charitatem, securi

Tract. 5.
in Epist.
Ioan.

esse possint. *Redeat unusquisque ad cor suum, si ibi invenerit fraternam Charitatem (ordinatam scilicet ad Deum) securus sit. Et antea. Si*

Tract. 9.
in Epist.

Charitatem habeas sufficiat tibi. Et iterum: Interroga viscera tua, si plena sint Charitate, habes

Philipp. 1.

Spiritum Dei. Qui enim cepit in vobis opus bonum perficiet usque in diem Christi.

Ut enim supra ex S. Bernardo vidimus:

Epist.
107.

Nemo se amari diffidat, qui jam amat. Libenter Dei Amor, nostrum, quem prævenit, subsequitur. Nam quomodo redamare pigebit, quos ama-

lib. de
diligen-
do Deo.

vit, & necdum amantes? Et alibi: Causa diligendi Deum Deus est, efficiens & finalis: ipse creat affectionem, desiderium ipse consummat. Hu-

jus veritatis fidejussorem habemus ipsam primam veritatem dicentem: Ego diligentes me diligo. Qui diligit me diligitur à Patre meo &c.

Quomodo autem divina bonitas se diligentem, & quem reciprocè diligit, derelinquet? Non stabit ex parte Dei, qui non vult mortem peccatoris, sed magis ut convertatur & vivat, sed ex parte hominis quod quando Deus homini infundit
ali-

aliqualem suamorem, is ad completum & perfectum non perducatur adeoque sibi imputare debet, quod in peccatis suis perseveret, *perditio tua ex te Israël.*

Secundò non ideo sententia aliqua est rejicienda quia aliquibus præbet materiam scrupuli; nonne multis materiam scrupuli suppeditant illa Scripturæ loca: *Multi sunt vocati, pauci vero electi. Arcta via est quæ ducit ad vitam, & pauci sunt qui inveniunt eam. Nemo scit an odio an amore dignus sit, & similia?* Non ideo tamen minus vera sunt. Deinde bonum foret quod multi fierent parum scrupulosi, qui jam plenâ ferè securitate conscientia malæ inhærent; deinde nimia illa securitas & facilitas, quam aliqui apprehendunt in consequendâ peccatorum remissione in causâ est quod aliqui nunquam verè & plenè consequantur peccatorum remissionem; cum enim sibi persuadeant se semel tundendo pectus, & dicendo, peccavi, obtinere, saltem cum Sacramento, absolutionem à suis peccatis rarò solent majores dispositiones, certò certius tamen requisitas ac necessarias, adhibere in ordine ad illum effectum; nonne similibus bonum foret quod fierent parum scrupulosi, ut sic majora, meliora ac certiora adhibeant media in ordine ad illum finem, & sic me-

lius accertius provideant animæ suæ salutis? Accedit quod jam multi passim vocentur scrupulosi, qui tamen secundum regulas legis æternæ dirigunt actiones suas, & per viam securiorem tendunt ad vitam æternam, utinam taliter omnes forent scrupulosi!

Nec etiam hæc sententia reddit difficile Sacramentum Pœnitentiæ; quid enim facilius quam Deum amare, cum tot Amoris ejus nobis suppeditaverit motiva? *Potes mihi dicere*, inquit S. Aug. *Non habeo quod tribuam indigenti, non possum jejunare frequenter, & à vino & carnibus abstinere non possum. Numquid potes mihi dicere Charitatem te habere non posse?* Et iterum: *In reliquis operibus bonis interdum potest aliquis qualemcumque excusationem prætere: in habenda verò dilectione nullus se poterit excusare. Potest mihi dicere aliquis, non possum jejunare: nunquid potest dicere, non possum amare? Potest dicere propter infirmitatem corporis mei non possum à vino, vel à carnibus abstinere, nunquid potest dicere, non possum diligere? Nemo se circumveniat quia Deus neminem fallit. Cum enim multa sint quæ propter fragilitatem humanam corporaliter implere non possumus, Charitatem tamen in corde nostro Deo inspirante, si in veritate voluerimus, sine aliqua dubitatione habere poterimus. Deinde non ita facile per Sacramentum, justificationis gratiam*

Hom. 6.
inter 50.

Serm.
59. de
temp.

tiam possumus obtinere ac multi sibi persuadent, nam teste Tridentino post gratiam baptismi amissam *ad vitæ novitatem & integritatem per Sacramentum Pœnitentiæ, sine magnis nostris fletibus & laboribus, divinâ id exigente iustitiâ, pervenire nequaquam possumus: ut merito Pœnitentiæ laboriosus quidam baptismus à Sanctis Patribus dictus fuerit. Labor iste (Pœnitentiæ post baptismum) paucorum est, qui post casum resurgunt, qui post vulnera convalescunt, qui lachrymosis vocibus adjuvantur, qui carnis interitu reviviscunt, ait Pacianus. Et quidem tam paucorum, ut dicat S. Ambrosius. Facilius inveni qui innocentiam servaverint, quam qui congruè egerint Pœnitentiâ. Quod si tamen facile quis dicere velit hoc Sacramentum, id non aliter dici potest quam ob conjunctum Amorem, cui nihil difficile est. Vide nostrum Tyrocin. part. 1. tr. 2. cap. 6. §. 3. ubi dicit S. Aug. Omnia fiunt facilia Charitati. leges Dei duræ sunt timori, leves Amori &c.*

Sess. 14.
cap. 2.

Epist. 3.
ad Sym-
pron.
lib. 2. de
pœnit.
cap. 10.

§. XVII.

An sicuti ad Charitatem perfectam ejus intentio, ita etiam requiratur ejus certa extensio seu per aliquod tempus duratio?

R Esp. Certum est ad Charitatem justificantem non requiri ut ad aliquod
G 5 tempus

tempus duret. Patet clarissimè quia SS. Patres manifestè innuunt hominem posse subitò quasi in instanti se per Charitatem perfectam ad Deum convertere, neque attendendum esse in peccatoris conversione ad mensuram temporis, sed doloris & Amoris. *Misericordiae Dei*, inquit Epist. 91. S. Leo: *nec mensuras possumus ponere, nec tempora definire, apud quem nullus patitur veniæ moras vera conversio, dicente Spiritu Dei per Prophetam: Cum ingemueris tunc saluus eris.*

Enchir.
cap. 65.

Serm. 66.
de Tempore.

Hinc & S. Augustinus ait: *In actione pœnitentiæ non tam consideranda est mensura temporis, quam doloris.* Et iterum. *Pœnitentia vera non annorum numero censetur, sed animi amaritudine.* Vnde Beatus Petrus mox à Domino indulgentiam recepit, quia amarissimè flevit trine negationis culpam. *Pœnitentia quamvis sit exigui temporis, si intimâ cordis amaritudine agitur, non despicitur apud judicem justum Deum qui cordis secreta considerat.* Non enim longitudinem temporis tantum requirit Deus, quantum affectum sinceritatis pœnitentis pensat. Quæ hic de pœnitentiâ dicunt SS. Patres, etiam de Charitate perfectâ, quam pœnitentia sufficiens ad justificationem sine Sacramento includit, prorsus dicendum est. Sic Christus Dominus Mariæ Magdalenæ peccatrici mox peccata remisit ob ejus dilectionem; *dimissa sunt ei peccata multa quoniam dilexit multum*, ait Christus. Hoc

Hoc tamen fatendum rarissimè contingere hominem gravi delicto à Deo avertum subitanè ac instantaneà ad Deum conversione perfectà poenitentià redire; factum id est in Zacheo, Maria Magdalena, Bono Latrone, Paulo, aliisque: verum optimè dicit S. Bernardus, quod similis mutatio dexteræ excelsi *non tam in Epist. 3.*
exemplum, quam miraculum afferri debeat. Unde unanimis Patrum est doctrina quod regulariter loquendo opus sit temporis morà ad perfectam peccatoris ad Deum per Charitatem conversionem, licet enim *Spiritus ubi vult spirat, & cuius vult miseretur,* ordinariè tamen non tantam ac tam ubèrem infundit simul homini gratiam, quàm quasi in instanti, se à creaturis avertat & ad Deum per Charitatem perfectam convertat, sed sensim & sensim ad hoc disponit gratuita Dei misericordia, instar divini cujusdam diei nobis exoritur Salvatoris gratia, ut supra vidimus, habet illa auroram suam, quàm mentium tenebras paulatim dissipat, perque incrementa varia & gradus assurgit, donec sensim diminutà Charitate incipit dominari Charitas, & eousque perfici, ut ad perfectum justitiæ diem accrescat.

§. XVIII.

Differentia inter Attritionem & Contritionem.

O Missis variorum sententiis circa Attritionis & Contritionis differentiam, breviter nostram tantum declaramus quæ ex dictis sufficienter colligi potest.

Suppono quod agamus hic de Attritione sufficienti & ad minus requisitâ cum Sacramento ad justificationem; quo supposito dicimus illud tantum esse discrimen inter Contritionem & Attritionem, quod Contritio procedat ex Charitate perfecta supra descripta, Attritio vero ex Charitate imperfecta, seu Amore Dei propter se imperfecto.

Seu, quod idem est, quod Contritio procedat ex timore filiali, Attritio verò ex timore initiali.

Pro cuius intelligentia notandum necessariò admitti debere *timorem initialem* ultra *timorem servilem & filialem*, quos duos aliqui tantum agnoscunt ut facilius probent Attritionem ex timore servili gehennæ sufficere cum Sacramento, tum enim sic argumentantur, non requiritur Attritio ex timore

timore filiali, ergo sufficit ex timore servili gehennæ prout in effectu procedit Abellii in tract. de Pœnitentiâ, quorum omnia argumenta per se corruunt quando ostenditur inter servilem & filialem timorem, necessario agnoscendum esse timorem medium scilicet initialem, qui quasi participat aliquid de utroque extremo.

Timoris hujus initialis mentionem facit S. Bernardus vel quisquis est Author, libro de modo bene vivendi ad sororem ubi dividit timorem in mundanum, servilem, initialem & castum seu filialem:

Humanus timor est ut ait Cassiodorus, quando timemus pati pericula carnis, vel perdere bona mundi, propter quod peccamus. Hic mundanus timor malus est. . . . Secundus timor est servilis, ut ait Beatus Augustinus, cum timore gehennæ homo recedit à peccato, & omnia bona quæ facit, non propter Deum, sed propter timorem inferni facit. Ille quasi servus timet, qui bonum quod facit, non timore amittendi bonum quod non amat, sed timore patiendi malum quod formidat, facit. Ille non timet perdere amplexus pulcherrimi sponsi, sed timet ne mittatur in pœnas inferni. De hoc servili timore ait Paulus: Non enim accepistis spiritum servitutis iterum in timore, sed accepistis spiritum adoptionis filiorum, id est spiritum filialem. Bonus est iste servilis timor,

cap. 4.

Rom. 8.

G

110 DISQUISITIO

& utilis, licet insufficiens & imperfectus
Hinc servilis timori succedit tertius timor videlicet
INITIALIS; quando homo incipit facere bonum
propter dilectionem Dei, quod antea faciebat pro-
pter timorem inferni. De hoc initiali timore ait
David Propheta in Psalmo: initium sapientiæ
timor domini. Initialis timor est quando homo
incipit Amare Deum quem ante timebat, & sic
excluditur à corde servilis timor. Hinc initiali ti-
mori succedit quartus timor, scilicet castus; per
quem timemus ne sponsus, scilicet Christus, taret,
ne discedat à nobis; ne enim offendamus, ne in
eum peccemus, & ne eum perdamus. Timor iste
scilicet castus de Amore descendit. Timor iste de
Amore nascitur. De hoc timore legitur in Psalmo:
Timor domini sanctus permanet in sæcu-
lum sæculi. Huc usque Bernardus. De
hoc timore etiam agit S. Salesius dicens:
Timor initialis vel addiscens procedit quidem ex
vero Amore sed Amore adhuc tenero, debili & in-
cipiente: timor autem filialis procedit ex Amore
firmo, solido. Illum denique agnoscit claris-
simè Angelicus Doctor 2. 2. q. 19. art.
2. dicens: Si aliquis convertatur ad Deum &
ei inhareat propter timorem pœnæ, erit timor ser-
vilis. Si autem propter timorem culpæ erit timor
filialis, nam filiorum est timere offensam Patris.
Si autem propter utrumque est timor initialis, qui
est medius inter utrumque timorem. Illum etiam
assignat Magister Sententiarum lib. 3.
dist. 34. §. D.

*Psal. 110.
& Pro-
verb. 8.*

*Psal. 118.
lib. 11.
de Amo-
re Dei
cap. 16.*

Qui

Qui ergo habet timorem filialem nudè respicit & detestatur peccatum in quantum est offensa Dei : qui autem habet timorem servilem nudè detestatur peccatum quia per illud incurreret pœnam gehennæ : qui verò habet timorem initialem detestatur peccatum partim quia est offensa Dei, partim quia per illud incurrit pœnam.

Quando autem Angelicus Doctor dicit quod timor initialis respiciat malum culpæ & pœnæ non id sic accipiendum est quasi uno actu timoris timeatur utrumque per modum unius objecti, quasi mediū compositi ex utroque, sed quia in eodem supposito, quod jam concepit timorem Charitatis, remaneat adhuc plurimum timoris servilis quoad substantiam. Quando enim aliquis incipit ambulare viam mandatorum Dei in Charitate, inchoatur in ipso quidam filialis timor, sed imperfectus, qui dicitur initialis, adeoque habet idem objectum quod filialis, verum cum ille timor filialis, sit debilis, tener & imperfectus adjungitur ei timor servilis quoad substantiam, qui assistat & juvet filialem recenter natum ut plenius & constantius malum culpæ repudiet, seque melius in pietatis operibus exerceat.

AR

An autem Attritio & Contritio differant specie nec ne, quæstio est Theologo indigna; quantum est ex parte motivi principalis non differunt specie, cum uterque pro principali motivo habeat malum culpæ ut est offensa Dei; Attritio autem ultra illud motivum principale habet adhuc aliud secundarium motivum nempe malum pænæ; quod motivum non habet Contritio; an verò eatenus debeant dici differre specie, quæstio est de nomine; cui inherere non est utile.

CONCLUSIO.

HÆc sunt Benevole lector, quæ in hac opinionum varietate breviter in gratiam meorum Tyronum de hac quæstione tractare volui, quam breviter potui exprimendo meam mentem. Si quis aliter sapiat, videat ut cum majori apparentia opinionem suam stabiliat, quod summopere videre desideramus, solummodo enim nostram protuli sententiam ad indagandum veritatem, quam si non ego consecutus fui libenter instrui & doceri volo; non enim ex illorum numero sum quibus nihil placet nisi proprii ingenii licet abortivi, factus: quia non majus

THEOLOGICA. 113

jus scio consequendi veram sapientiam
 impedimentum; quam sua præjudicia &
 errores perfas & nefas velle tueri, licet
 ab aliis satis clarè detecti sint etiam ipso-
 rum judicio; quidquid sit non est signum
 candidi animi, neque in illo Augustiniana
 humilitas reperitur, hic enim S. Pater
 toti mundo suos priores errores propala-
 vit scribendo Retractionum libros. Cu-
 jus Sanctissimi Patris nostri exemplum
 quam libentissime nos imitari volumus
 non tantum quando Sanctissimæ Matri
 Ecclesiæ, Christi in terris vicario, cu-
 jus judicio omnia mea subjicio, contra-
 rium videbitur, sed & quodcumque
 etiam à privatis ex S. Scriptura, Tradi-
 tione, legitimis Conciliis aut SS. Patri-
 bus convincar; licet autem quandoque
 in contra à ratione naturali argumenta
 aliqua objiciantur, tam ingentia ut vix,
 quid regeram, habeam, non ideo cedo
 meæ opinioni in Verbo Dei scripto vel
 tradito, Conciliis vel Patribus fundato,
 horum enim Authoritas argumentis à
 ratione naturali petitis præponderare
 Theologo debet; & hoc libentissimè fa-
 teor quandoque me vix posse respondere
 rationibus naturalibus, nec mirum cum
 Theologia nostra sicuti & fides, à quâ
 vel nihil vel parum differt, sæpe superet

H

ratio-

114 DISQUISIT. THEOLOG.

rationem nostram & tantum ex Verbo
Dei scripto vel tradito probari possit.

Sisto calamum & finio cum illo S. Au-
gustini de Charitate elogio : *Quidquid se*
De grat. & lib. arb.c.18. *putaverit homo facere bene, si fiat sine Charitate*
nullo modo fit bene.

*Ad Majorem Dei, Beatissimæ Ma-
riæ Virginis, SS. Augustini &
Norberti Gloriam.*

F I N I S.



INDEX



INDEX

PARAGRAPHORUM.

S copus & intentio Authoris.	§. I. fol. r
<i>Ostenditur quomodo eadem difficultas urgeat adversarios, quæ nostræ sententiæ defensores.</i>	§. II. 4
<i>An sufficiat cum Sacramento ad justificationem Amor Concupiscentiæ Sanctæ, seu Castæ.</i>	§. III. 6
<i>Non omnis Dei propter se Amor sufficit cum Sacramento ad justificationem.</i>	§. IV. 13
<i>Non omnis Dei propter se Amor statâ & infallibili lege justificat sine Sacramento.</i>	§. V. 15
<i>An detur Charitas & ex eâ procedens Contritio statâ & infallibili lege justificans, etiam sine actuali susceptione Sacramenti, aut perpeffione martyrii.</i>	§. VI. 24
<i>Proponitur Sententia, quæ tenet requiri ad Sacramentum Pœnitentiæ Contritionem Perfectam ex Charitate Perfectâ procedentem, quæ justificat sine Sacramenti actuali susceptione, & fertur de illâ judicium Authoris.</i>	§. VII. 29
<i>Proponitur sententia quæ in adultis, post promulgatam perfectæ novæ legem, extra casum martyrii, actualem Sacramenti susceptionem ita esse necessariam tenet, ut sine illa nullo modo è statu peccati ad statum gratiæ seu justificationis perungere possint, & refertur de eâ SS. Patrum judicium.</i>	§. VIII. 42
<i>Proponitur sententia eorum qui tenent extra casum martyrii & articulum mortis nunquam de facto aliquem justificari sine actuali Sacramenti perceptione, & fertur de illâ judicium.</i>	§. IX. 47
<i>Proponitur sententia quæ docet quod quando adest copia Confessariæ Contritio perfectâ non justificet sine reali susceptione Sacramenti, & consequenter nec Charitate perfectâ, & fertur de illâ judicium.</i>	§. X. 59 Pre-

§. XI.

Proponitur mens Authors de sufficienti & requisito Dei propter se amore cum Sacramento. 64

§. XII.

An ille praevalidans De amor sit Dei super omnia & perfectus amor? 68

§. XIII.

Quandam Charitas sufficienter sit perfecta ad hoc ut sine actuali Sacramenti adminiculo hominem Deo reconciliari possit? 78

§. XIV.

Proponitur & discutitur difficultas, cur non omnis Dei amor praevalidans licet imperfectus iustificet antequam Sacramentum actu suscipiatur, cum per illum homo se avertat à creaturis graviter inordinatè amatis, & convertat ad creatorem, conversio autem peccatoris per amorem ad Deum tollat peccatum. 85

§. XV.

Undenam oriatur una Charitas seu Dei propter se amorem praevalidantem esse parvum, debilem, imbecilem ac invalidam & indigere motivo penarum ad excludendum omnem affectum ad creaturam graviter inordinatum; alterum vero robustum, magnum, & fortem, ac se solo omnem illum affectum excludentem. 89

§. XVI.

Quanam Charitatis intensio requiratur ad hoc ut Charitas sit perfecta & quanam ad hoc ut cum Sacramenti actuali auxilio tantum iustificet. 95

§. XVII.

An sicuti ad Charitatem perfectam ejus intentio, ita etiam requiratur ejus certa extensio seu per aliquod tempus duratio? 105

§. XVIII.

Differentia inter Attritionem & Contritionem. 108

FINIS.



ERRATA.

Fol. 7. lin. ultima ed lege sed. fol. 14. lin. prima sensum lege sensum. fol. 32. lin. penultima si lege hi. fol. 49. lin. 26. adde §. 6. fol. 65. lin. 12. dele, non, ante verbum, habet. fol. 77. lin. 19. perfectior lege perfectiorem. fol. 96. lin. 21. intentio lege intensio: item fol. 105. lin. 24. fol. 107. lin. 26. charitate lege cupiditate.